

清

史

稿

清史稿

志

食貨五

錢法

茶法

鑛政

錢法太祖初鑄天命通寶錢別以滿漢文爲二品滿文爲一品錢質較漢文一品爲大天聰因之世祖定鼎燕京大開鑄局始定一品於戶部置寶泉局工部置寶源局順治通寶錢定制以紅銅七成白銅三成搭配鼓鑄錢千爲萬二千串爲一卯年鑄三十卯每錢重一錢二年增重二分定錢七枚準銀一分舊錢倍之民間頗病錢貴已更定十枚準一分各省鎮遵式開鑄先後開山西陝西密雲薊宣大同延綏臨清盛京江西河南浙江福建山東湖廣及荊州常德江甯三府鑄局五年停盛京延綏二局六年移大同局於陽和七年開襄陽鄖陽二府鑄局八年停各府鎮鑄十年復開密雲薊宣陽和臨清鑄局初戶部以新鑄錢足用前代惟崇禎錢仍暫行餘準廢銅輸官償以直並禁私鑄及小錢僞

錢更申舊錢禁嗣以輸官久不盡通令天下限三月期畢輸逾限行使罪之是年廷議疏通錢法以八年增重一錢二分五厘爲定式幕左漢文一厘二字右寶泉鑄一字曰戶寶源曰工各省鑄並鑄開局地名一字如太原增原字宣府增宣字之類錢千準銀一兩定爲書一通行之制禁私局犯者以枉法贓論時官錢壅滯通以斂散法酌定京外局錢配搭俸餉錢糧舊制微銀七錢三皆著爲令而直省局錢不精私鑄乘之卒壅不行悉罷鑄專任寶泉寶源精造一錢四分重錢幕用滿文俾私鑄艱於作僞現行錢限三月銷燬更定私鑄律爲首及匠人罪斬決財產沒官爲從及知情買使總甲十家長知情不首地方官知情分別坐斬絞告奸賞銀五十兩十七年復直省鑄令準重錢式幕兼用滿漢文康熙元年鑄紀元錢後凡嗣位改元皆鑄如例高宗內禪鑄乾隆錢十二嘉慶錢十八非常例也自改鑄一錢四分錢奸民輒私銷乃定律罪之比私鑄遂禁造銅器爲私銷也十八年申嚴其禁軍器樂器之屬許造用五斤以下者時重錢銷益少直苦昂二十三年允錢法侍郎陳廷敬料復一錢舊制久之錢貴

如故乃申定錢直禁錢一兩易錢母得不足一干然錢直終不能平季年銀一兩易錢八百八十至七百七十乃發五城平糶銀易銀以平其價自舊錢申禁而閩地僻遠猶雜制錢行之二十四年巡撫金鑑以爲言學士徐乾學疏稱自古皆古今錢相兼行使聽從民便因歷數歷代舊事謂自漢五銖以來未嘗廢古而專用今隋銷古錢明天啓後盡括古錢充鑄錢之變也且錢法敝可資古錢以澄汰故易代仍聽流通矧閩處嶺外宜聽民行使上聽其言盡寬舊錢廢錢之禁是年定旗籍私鑄私銷罪如律四十一年以循舊制改輕錢私鑄復起廷臣請罷小制錢仍鑄一錢四分重錢新舊錢暫兼行新錢千準銀一兩舊錢準七錢詔從之然私鑄竟不能止四十五年山東請鑄大錢會獲得常山私鑄上以私鑄不盡大錢必多私銷宜先收後禁乃令錢糧銀一兩折收二千文錢盡折收銅器戶部以新錢不敷請展至五年後燬舊鑄越二年襄陽私鑄錢潛貯漕艘入京大理卿塔進泰奉命會查疏請嚴禁收燬再犯私鑄私販罪如律給戶運弁罪同私鑄地方官知情斬決沒其家失察奪職法益加嚴官局用銅

自四十四年兼採滇產雍正元年巡撫楊名時請歲運滇銅入京廷議卽山鑄錢爲便因開雲南大理霑益四局鑄運京錢幕文曰雲泉上以錢爲國寶更名寶雲並令直省局錢幕首寶字次省名純滿文其後運京錢時鑄時罷乾隆二一年以錢價久不平飭大興宛平置錢行官牙以平錢價上念私銷害尤甚益厲行銅器禁官非三品以上不聽用舊有銅器限三年內輸官逾限以私藏禁物論已禁仍造罪比盜鑄爲從遂通令禁造銅器尋益嚴限制惟一品始聽用餘悉禁之藏匿私用皆以違禁論十二年上以錢重則私銷輕則私鑄令復一錢二分舊制十三年定翦錢邊律罪爲絞監候先是尙書海望以銅禁病民疏陳四弊高宗然之遂罷禁銅收銅令復以京師錢價昂銀一兩僅易八百文詔發工部節慎庫錢平價御史陶正靖疏陳錢價不平弊由經紀蠹害錢法違命革除之浙江布政使張若震言錢貴弊在私煨如使配合銅鉛參入點錫鑄成青錢則銷者無利試之驗因採其議鑄與黃錢兼行定私鑄鉛錢禁爲首及匠人絞監候爲從及知情買使減一等申嚴販運及囤積制錢之禁凡積錢至百千

以上以違例論上諭廷臣曰今之言禁者亦第補偏救弊非能正本清源也物之定直以銀不以錢而官民乃皆便錢不便銀趨利之徒以使低昂爲得計何輕重之倒置也嗣是宜重用銀凡直省官修工程民間總置貨物皆以銀二十年兩廣總督李侍堯請禁舊錢僞錢上以民間雜用吳三桂利用洪化昭武諸僞錢第聽自檢出官爲易之以充鑄舊錢仍聽行使二十四年回部平頒式於葉爾羌鑄乾隆通寶枚重二錢幕鑄葉爾羌名左滿文右回文用紅銅並燬舊普爾錢充鑄越二年阿克蘇請鑄如葉爾羌例復允西藏開鑄銀錢重一錢與五分二種文曰乾隆寶藏幕用唐古忒字邊郭識年分以上二類錢第行之回藏內地不用二十九年令回部鑄錢永用乾隆年號時至中葉錢直昂直省皆增鎚廣鑄價暫趨於平會銅運遲滯市儉居奇增直害錢法通飭督撫毋得輕請停鎚減卯季年私鑄益多四川雲貴爲淵藪流布及江浙雲貴官錢亦以不善罷鑄又自律嚴私鑄常寬之以收燬莠民恃以行詐私錢日出不窮五十七年湖廣總督畢沅請收買毋立限上謂湖北乃私鑄總匯不圖禁絕而預思

所以卸過命嚴稽私販仍予寬限二年五十九年以官私錢鑄出錢賤乃暫罷直省鑄私錢通限一年收繳而吏胥緣爲奸嘉慶元年復直省鑄至十年直省未盡復卯錢復貴通飭各督撫按卯鼓鑄然嗣是局私私鑄相踵起京局錢至輪郭肉好糝糊脆薄寶蘇鑄中雜沙子擲地卽碎而貴州湖廣私鑄盛行江蘇官局私局秘匿至道光間閩廣雜行光中景中景興嘉隆諸夷錢奸民利之輒從仿造貴陽大定官局亦別鑄底大錢錢法自是益壞時華洋互市以貨易銀番船冒禁歲漏出以千萬計御史黃中模章沅咸以爲言而大髻小髻蓬頭蝠蝠雙柱馬劍各種番銀亦潛輸內地以規利自閩廣通行至黃河以南而洋商復挾至各省海口陽置貨而陰市銀至洋銀日多紋銀日少而貴上患之命粵督申嚴禁約然所禁不及洋銀仿鑄之廣板福板杭板吳莊行莊耗華銀如故御史黃府滋請並禁使出洋更立專條議從重科十七年詔沿江沿海督撫海關監督飭屬嚴稽偷漏定功過行賞罰而海內銀卒耗竭每兩易錢常至二千廷臣謀所以重錢以殺銀之勢而議格不行先是道光中葉銀外洩而貴朝野

皆欲行大錢以救之廣西巡撫梁章鉅疏言其利文宗卽位四川學政何紹基力請行大錢以復古救時上意初不謂然卒與官票寶鈔行焉鈔管行於順治八年歲造十二萬八千有奇十年而罷嘉慶間侍講學士蔡之定請行鈔咸豐二年福建巡撫王懿德亦以爲請廷議以窒礙難行卻之是時銀虧錢匱重而軍需河餉糜帑二千數百萬籌國計者率以行官票請次年命戶部集議惠親等請飭部製造錢鈔與銀票相輔並行票鈔製以皮紙額題戶部官票左滿右漢皆雙行中標二兩平足色銀若干兩下曰戶部奏行官票凡願將官票兌換銀錢者與銀一律並準按部定章程搭交官項僞造者依律治罪邊文龍鈔額題大清寶鈔漢字平列中標準足制錢若干文旁八字爲天下通寶平準出入下曰此鈔卽代制錢行用並準按成交納地丁錢糧一切稅課捐項京外各庫一概收解邊文如票大錢當千至當十凡五等重自二兩遞減至四錢四分當千當五百淨銅鑄造色紫當百當五十當十銅鉛配鑄色黃百以上文曰咸豐元寶以下曰重寶幕滿文局名四年以乏銅兼鑄當五錢錢及制錢已而更鑄

鉛制錢乾隆間京局用銅滇洋兼資後專行滇運時以道梗銅滯故權宜出此定議票銀一兩抵制錢二千鈔二千抵銀一兩票鈔亦準是互相抵民間完納丁糧稅課及一切官款亦準五成京外應放庫款如之大錢上下通行如票鈔抵銀如制錢之數輸官以三成錢錢通用如大錢阻撓罪以違制偽造鈔票斬監候私鑄加嚴通飭京外設置官錢局尋以直省延不奉行嗣後議於各府置鈔局發大錢於行店俾錢鈔通融互易以便民丁糧搭收票鈔零星小戶銀鈔尾零搭交銅錢大錢皆先從直隸山東實行官吏折勒做法商民交易不平價從嚴處治七年令順天直隸各屬錢糧自本年上半年始以實銀四成寶鈔三成當十銅錢大錢三成搭交一切用項亦按成搭放尋從戶部議自本年下半年始直隸照銀七票三徵收大錢三成卽納在鈔票三成內交票交錢聽便然鈔法初行始而軍餉繼而河工搭放皆稱不便民情疑阻直省搭收五成以款多抵撥既艱搭放遂不復肯搭收民間得鈔積爲無用京師持鈔入市非故增直卽匿貨持向官號商鋪所得皆四項大錢不使用故鈔行而中外兵民病之其後

京師以官號七折錢發鈔直益低落至減發亦窮應付鈔遂不能行矣大錢當千當五百以折當過重最先廢當百當五十繼廢錢錢以私票使之而亦廢乃專行當十錢盜鑄叢起死罪日報而不爲止局錢亦漸惡雜私鑄中不復辨奸商因之折減挑剔任意低昂商販患得大錢皆裹足三成搭收徒張文告屢禁罔效法弊而撓法者多固未有濟也當十錢行獨久然一錢當制錢二出國門卽不通行咸豐之季銅苦乏申禁銅收銅令同治初鑄錢所資惟商銅廢銅當十錢減從三錢二分光緒九年復減爲二錢六分時孝欽顯皇后銳意欲復制下廷臣議以滇銅運不如額姑市洋銅交機器局試鑄戶部奏稱機器局鑄錢並京局開鑄之不便遽旨罪其委卸卒命直隸總督李鴻章於天津行之重準一錢遂賞唐炯巡撫銜專督雲南銅政十四年廣東試鑄機器錢以重庫平七分識於幕二十四年命直省鑄八分錢而京師以制錢少行當十錢如故三十二年鑄銅幣當十錢民不樂用於是創鑄銀銅圓設置銀行思劃一幣制與東西洋各國相抗衡初洋商購集粵東西班牙英吉利銀錢大輸入總督林則徐

謀自鑄圖抵制以不適用而罷嗣是墨西哥日本以國幣相灌輸光緒十四年張之洞督粵始用機器如式試鑄李鴻章繼任續成之文曰光緒元寶庫平七錢二分廣東省造幕紋龍並鑄三錢六分一錢四分四釐七分二釐三分六釐四種小銀圓中國自行銀錢自此始湖北江西直隸浙江安徽奉天吉林以次開鑄尋以廣東湖北江西所鑄最稱使用許以應解京餉撥充鑄本直省未開鑄者飭從附鑄京外收放庫欸準搭三成因命劉坤一張之洞陶模籌議三局造鑄事宜已復由戶部核定七省所鑄規模成色苦參差不利通行會造幣總廠成擬撤其三而留江南直隸廣東爲分廠初鑄準重墨圓議者頗非之之洞始於湖北試行一兩銀幣戶部亦以中國立算夙準兩錢分釐因定主幣爲庫平一兩而以五錢一錢小銀幣暨銅圓制錢輔助之令總分廠如式造行銅元鑄始閩廣江蘇繼之時京局停鑄命各運數十萬入京由戶部發行備用沿江沿海省分並飭籌欸附鑄而直省陸續開鑄造幣總廠反後成總廠擬鑄之幣凡三品曰金曰銀曰銅最先鑄銅幣自當制錢二十降至當二自重四錢降而

四分凡四種文視直省小異大同直省曰光緒元寶總廠初同直省嗣定曰大清銅幣皆識某所造幕皆龍文紫銅鑄直省間亦用黃銅凡私造銅幣偽造紙幣罪視制錢加等初鑄銅元爲補制錢之不足旋斂其餘利新政餉需皆取給焉競鑄爭售乃至不能數鑄本兩江總督周馥首疏其弊戶部爲立法限制之繼與政務處上補救八事旋以開鑄者多至十七省省至二三局恐終難言盡一乃令山東歸併直隸湖北歸併湖南江南安徽歸併江甯浙江歸併福建廣西歸併廣東合奉天河南四川雲貴爲九廠由部派員會辦遣大臣周歷察核與戶部籌定會辦事宜顧銅元以積賤富十錢僅能及半數民私局私鑄叢奸弊應準銀者銅元折合類致虧損物價翔貴民生日益凋敝省與省復相軋至不相流通山東巡撫袁樹勛繼陳十害時總廠初鑄銅幣常留寶泉鑄六分制錢廣東請改鑄一文錢由總廠頒式通行三十四年命各銅元廠加鑄一文新錢如銅圓式蓋存一文舊制藉爲銅圓補救也自大理少卿盛宣懷奏設通商銀行議者以東西洋各國皆有國立銀行能持國內外財政二十九年戶部

請設置官銀行以部專其名糾合官商資本四百萬通用國幣發行紙幣官款公債皆主之尋爲發行紙幣並開紙印刷二廠會戶部改度支更銀行名曰大清設正副監督各一造幣總廠亦如之銀行內並附設儲蓄銀行畫一幣制載入各國新定商約部議宜先審定銀幣試行效則積金鑄幣三品之制可使同條共貫第計元計兩尙持兩端德宗下其事於督撫適有以實行商約速定幣制請者下政務處核議各督撫亦先後議上主兩者至十一省主圓者僅八省度支部前亦頒布用兩遂定一兩爲主幣復由部設幣制調查局而審慎於鑄造推行畫一成色分量之間至宣統二年仍前定名曰圓銀幣一圓爲主幣五角二角五一角三種銀幣五分一種銅幣二分一分五釐一釐四種爲輔幣銀幣重七錢二分餘遞降並撤直隸銀銅造幣廠而留漢口廣東成都雲南四廠前所鑄大小銀元暫照市價行使將來由總廠銀行收換改鑄三品之制首金次銀光緒中葉英金磅歲騰長每磅自華銀四兩一錢六分五釐增至八兩有奇御史王鵬運通政司參議楊宜治嘗建議積金仿鑄三十年戶部疏請備造

幣之用納官者皆準金出使大臣汪大燮極言用金之利孫寶琦則請對內用銀對外必預計用金廷臣之論國幣者亦以不臻至用金幣制不爲完善皆請速定用本位金卒未能實行云

茶法我國產茶之地惟江蘇安徽江西浙江福建四川兩湖雲貴爲最明時茶法有三曰官茶儲邊易馬曰商茶給引徵課曰貢茶則上用也清因之於陝甘易番馬他省則召商發引納課間有商人赴部領銷者亦有小販領於本籍州縣者又有州縣承引無商可給發種茶園戶經紀者戶部寶泉局鑄刷引由備書例欵直省預期請領年辦年銷茶百斤爲一引不及百斤謂之畸零另給護帖行過殘引皆繳部凡僞造茶引或作假茶與販及私與外國人買賣者皆按律科罪司茶之官初沿明制陝西設巡視茶馬御史五西甯司駐西甯洮州司駐岷州河州司駐河州莊浪司駐平番甘州司駐蘭州尋改差部員又令甘肅巡撫兼轄後歸陝甘總督管理四川設鹽茶道江西設茶引批驗大使隸江甯府歲徵之課江蘇發引江甯批發所及荆溪縣屬張渚湖汊兩巡檢司安徽發

引濟山太湖欽休寧黟宣城寧國太平貴池青陽銅陵建德蕪湖六安霍山廣德建平十七州縣江西發引徽商及各州縣小販此三省稅課均於經過各關按則徵收浙江由布政使委員給商每引徵銀一錢北新關徵稅銀二分九釐二毫八絲葉入關稅報解又每歲辦上用及陵寢內廷黃茶共百一十餘篋由辦引委員於所收茶引買價內辦解湖北由咸寧嘉魚蒲圻崇陽通城興國通山七州縣領引發種茶園戶經紀坐銷建始縣給商行銷坐銷者每引徵銀一兩行銷者徵稅二錢五分課一錢二分五釐共額徵稅課銀二百三十兩有奇行茶到關仍行報稅湖南發善化湘陰瀏陽湘潭益陽攸安化邵陽新化武岡巴陵平江臨湘武陵桃源龍陽沅江十七州縣行戶共徵稅銀二百四十兩陝甘發西甯甘州莊浪三茶司而西安鳳翔漢中同州榆林延安寧夏七府及神木廳亦分銷焉每引納官茶五十斤餘五十斤由商運售作本每百斤爲十篋每篋二封共徵本色茶十三萬六千四百八十篋改折之年每封徵折銀三錢其原不交茶者則徵價銀共五千七百三十兩有奇亦有不設引止於本地行

銷者由各園戶納課共徵銀五百三十兩有奇四川有腹引邊引土引之分腹引行內地邊引行邊地土引行土司而邊引又分三道其行銷打箭鎗者曰南路邊引行銷松潘廳者曰西路邊引行銷邛州者曰邛州邊引皆納課稅共課銀萬四千三百四十兩稅銀四萬九千一百七十兩各有奇雲南徵稅銀九百六十兩貴州課稅銀六十餘兩凡請引於部例收紙價每道以三釐三毫爲率盛京直隸河南山東山西福建廣東廣西均不頒引故無課惟茶商到境山經過關口輸稅或略收落地稅附關稅造銷或彙入雜稅報部此嘉慶前行茶事例也厥後泰西諸國通商茶務因之一變其市場大者有三曰漢口曰上海曰福州漢口之茶來自湖南江西安徽合本省所產溯漢水以運於河南陝西青海新疆其輸至俄羅斯者皆磚茶也上海之茶尤盛自本省所產外多有湖廣江西安徽浙江福建諸茶江西安徽紅綠茶多售於歐美各國浙江紹興茶輸至美利堅甯波茶輸至日本福州紅茶多輸至美洲及南洋羣島此三市場外又有廣州天津芝罘三所洋商亦購集焉蓋茶之性喜煖惡寒喜濕惡燥又必

避懷烈之風最適於中國泰西商務雖盛然非其土所宜不能不仰給於我國用此駸駸徧及全球矣其業此者有總商有散商領引後行銷各有定域亦有兼行票法者如四川自乾隆五十二年開辦製工茶票後名目甚繁然第行於產多或銷暢之區非遍及各州縣也惟甘商舊分東西二櫃東櫃多籍隸山西陝西西櫃則回民充之自咸豐中回匪滋事繼以盜賊充斥兩櫃均無人承課總督左宗棠勘定全省乃奏定章程以票代引遴選新商採運湖茶是曰南櫃時領票止八百餘張嗣定爲三年一案領票准加不准減計自光緒十三年至二十七年逐案加增三十年又於湖票外更行銷伊犁之晉票迄於宣統二年茶務日盛茶之與鹽辦法略相似惟鹽爲歲入大宗故掌國計者第附於鹽而總核之其始但有課稅除江浙額引由各關徵收無定額外他省每歲多者千餘兩少祇數百兩或數十兩卽陝甘四川號爲邊引亦不滿十萬金咸豐以來各省次第行盤光緒十二年福建冊報至十九萬餘兩他省欸亦漸多未幾收數復絀宣統三年豫算表所載茶稅特百三十餘萬而已順治初元定茶馬事

例上馬給茶篋十二中馬給九下馬給七二年差御史轄五茶馬司時商人多越境私販番族利其值賤趨之若鶩兼番僧馳驛往來夾帶私茶出關吏不能詰戶部奏言陝西以茶易馬明有照給金牌勘合之例今可勿用但定價值至番僧所至如官吏縱容收買私茶聽巡按御史參究茶馬御史廖攀龍又言茶馬舊額萬一千八十八匹崇禎三年增解二千匹請永行蠲免並從之四年命巡視茶馬滿漢御史各一直隸河寶營地當張家口之西明時鄂爾多斯部落曾於此交易茶馬旋封閉至是戶部差理事官履勘以狀聞諭仍准互市七年以甘肅舊例大引篋茶官商均分小引納稅三分入官七分給商諭嗣後各引均由部發照大引例以爲中馬之用又舊例大引附六十篋小引附六十七斤定爲每茶千斤概准附百四十斤聽商自賣十三年以甘肅所中之馬既足命陳茶變價充餉十四年復以廣甯開成黑水安定清安萬安武安七監馬蕃命私馬私茶沒入變價原留中馬支用者悉改折充餉十八年從達賴喇嘛及根都台吉請於雲南北勝州以馬易茶康熙四年遂裁陝西苑馬各監開茶馬市

於北勝州七年裁茶馬御史歸甘肅巡撫管理十九年以軍需急加福建茶課銀三百五十九兩至二十六年豁免並除湖廣新增茶稅銀時四川產茶多其用漸廣戶部議增引迄康熙末天全土司雅州邛榮經名山新繁大邑灌縣並有所增二十四年刑科給事中裘元佩言洮岷諸處額茶三十餘萬篋可中馬萬匹陳茶每年帶銷又可中數萬匹請遣員專管三十六年遂差部員督理茶馬事務四十年以陝西私茶充斥令嚴查往來民人凡攜帶私茶十斤以下勿問其馱載十斤以上無官引者論罪四十四年以奸商恃有前例皆分帶零運私販轉多飭照舊緝捕停差部員仍歸甘肅巡撫兼理自康熙三十二年因西密五司所存茶篋年久溘爛經部議准變賣後又以蘭州無馬可中將甘州舊積之茶在五鎮俸餉內銀七茶三按成搭放尋又定西寧等處停止易馬每新茶一篋折銀四錢陳茶折六錢充餉至六十一年復增西寧莊浪岷州河州茶引各處所存舊茶悉令變賣雍正三年遂議自康熙六十一年始五年內全徵本色五年後卽將舊茶變賣嗣是出陳易新總以五年爲率四年定陝西行茶

改令產茶地方官給發船票照商人引目茶數開明如於部引外搭行印票及附茶不遵定額者照私鹽律論查驗失察故縱均加處分八年命陝西商運官茶於舊例每百斤准附帶十四斤外再加耗茶十四斤又諭四川茶稅皆論園論樹夫樹有大小園有寬狹豈能一致若據以爲額未得其平應照斤兩收納著該撫詳議尋議舊例每斤徵課二釐五毫今但徵四絲九忽有奇前後懸絕應酌減其半無論邊土腹引俱納銀一釐二毫五絲時川茶行銷引尙不敷於是復增各府州縣再行給發九年命西甯五司復行中馬法十年又命中馬應見發茶時安徽亦增引照四川例以餘引暫存司庫遇不敷時配給行運十三年復停甘肅中馬始定雲南茶法以七元爲一筒三十二筒爲一引照例收稅乾隆元年令甘肅官茶改徵折色每篋輸銀五錢時西甯五司陳茶充牣令每封減價二錢刻期變買二年以江西南昌等三十二州縣地不產茶四川成都彭灌等縣滯銷其引或停或減並豁除課銀七年免甘肅地震處之課乃命西甯五司徵本色八年免四川天全所欠乾隆七年前之羨餘截角成都彭灌等

縣之未完銀兩十一年甘肅巡撫黃廷桂奏言西寧河州莊浪三司番民錯處惟茶是賴邇年以糧易茶計用茶六萬五千五百餘封易雜糧三萬八千一百餘石請著爲例報可十三年定甘肅應徵茶封每年收二成本色八成折色並申明水陸各路運商驗引截角法推行安徽浙江四川雲南貴州二十四年從甘肅巡撫吳達善言命西甯五司茶封照康熙三十七年例搭放各營俸餉二十五十年吳達善又言甘省茶課向爲中馬設今其制已停在甘莊二司地處衝衢西河二司附近青海猶有銷路惟洮司偏僻商銷茶斤曆年俱改別司售賣而交官茶封仍歸洮庫往往積至數十萬封始請疏銷應將洮司額頒茶引改歸甘莊二司給商徵課俟洮司庫貯搭餉完日卽行裁汰二十七年陝甘總督楊應琚復條上疏銷事宜四一官茶應改徵折價也查甘肅庫貯官茶向例如存積過多改徵折色今五司庫內自乾隆七年至二十四年已存百五十餘萬封經前撫臣吳達善奏准每封作價三錢搭放兵餉已搭放四十餘萬封在市肆官茶日多非十年之久不能全數疏銷且每年商人又增配二十四萬封商

茶既多官茶益滯莫若將商交二成官茶五萬四千餘封照例每封徵折價三錢俟陳茶銷售將完再徵本色一商茶應准減配也查甘肅茶法商人每引交茶五十斤無論本折仰係額課外有充公銀三萬九千餘兩亦係按年交納無殊正供至商人自賣茶封每引止應配正茶五十斤連附茶共配售三十餘萬封商人卽以配售之茶納課經吳達善奏准增配以紓商力並無課項第茶封既增又有搭放兵餉之官茶勢致愈積愈多難免停本虧折今商人願每引止五封內應減無課茶十五萬八千三百十六封共止配茶四十萬九千四百四十封二成本色茶封既議改徵折價無庸配運一陳積茶封應召商減售也查各司俱有陳茶而洮司爲多見每封四錢發售商民裹足請仍照原議每封定價三錢召商變賣一內地新疆應一體搭放也查乾隆二十四年吳達善奏准滿漢各營以茶封搭餉至新疆茶斤向資內地今官茶以沿途站車輓運無庸脚費其自肅州運至各處將脚價攤入茶本之內較之買自商買尙多減省疏入議行二十九年裁甘肅巡撫茶務歸陝甘總督兼理三十四年以甘省庫貯

官茶漸少復徵本色一成三十六年又以伊犁等處安插投誠土爾恩特等衆賞給茶封仍議照舊徵收二成三十八年四川總督劉秉恬奏准三雜谷等處土司買茶以千斤爲率使僅數自食不能私行轉售四川設邊引商人納稅領運於松潘等處銷售無論土司蠻商俱准赴邊起票販運嘉慶七年以陝西神木官銷茶引久經撥歸甘省商銷令豁除舊存羨餘名目四川教匪滋擾獨除大甯廣元太平通江南江五州縣茶稅十年復免大甯太平通江巫山四縣廳稅課十七年以甘肅庫茶充羨定商納官茶全徵折色二十二年諭閩皖浙商人販運武夷松羅茶赴粵銷售向由內河行走近多由海道販運夾帶違禁貨物私賣飭令茶商仍由內河行走永禁出洋販運違者治罪茶入官道光三年諭那彥成奏定新疆行茶章程經戶部議覆烏里雅蘇台科布多磚茶不得侵越新疆各城售賣茲將軍果勒豐阿等奏此項磚茶由歸化城張家口請領部票納稅而來已六十餘年未便遽行禁止惟新疆旣爲官茶引地商茶究有礙官引令嗣後商民每年馱載磚茶一千餘箱前赴古城仍照例給票無許往他

處售質六年諭前因新疆各城運茶前將軍等請給引招商納課茲據慶祥等奏稱各城無殷實之戶若遽令承充官商必致運課兩誤著北路商民專運售雜茶並在古城設局抽稅卽以所收銀抵蘭州茶商課俟試行三年再行定額至附茶仍由甘商運銷八年欽差大臣那彥成言甘肅官茶年例應出關二十餘萬封近來行銷至四五十萬封皆以無引私茶影射價復遞加每附茶一封售銀七八兩至十餘兩不等請嗣後每封定價阿克蘇不得過四兩喀什噶爾不得過五兩並於嘉峪關外及阿克蘇等處設局稽查詔如所請九年命甘肅茶務責成鎮迪道總司稽查奇臺縣就近經管咸豐三年閩浙總督王懿德奏請閩省商茶設關徵稅五年福建巡撫呂佺孫復言閩茶向不頒給執照徵收課稅自道光二十九年直隸督臣訥爾經額以閩商販運官私莫辨議由產茶之崇安縣給照經過關隘驗稅放行嗣因產茶不止一處商人散赴各縣購買繞道出販復經撫臣王懿德奏請自咸豐三年爲始凡出茶之沙邵武建安歐甯建陽浦城崇安等縣一概就地徵收茶稅由各縣給照販運先後下部議准

前歲因粵匪竄擾江楚茶販不前暫弛海禁各路茶販遂運茶至省不從各關經過不特本省減稅卽浙粵江西亦形短絀臣履任後徧詢茶商獲利較前不啻倍蓰商利益厚正賦轉虧見粵匪未平軍需孔急衆商身擁厚貨什一取盈初無所損且徵諸販客不致擾累貧民完自華商無慮糾纏洋稅以天地自然之利爲國家維正之供迥非加增田賦者比但閩茶不止數縣必在附省扼要處所設關增卡給印照以憑查核連界各省亦應一體設立俾免趨避請自咸豐五年始凡販運茶斤概行徵稅所收專欸留支本省兵餉惟創行伊始多寡未能預定俟行一二年後再行比較定額自此閩稅始密然至十年猶未報部經部飭催乃按期奏報六年允伊犁將軍扎拉芬奏請伊犁產茶設局徵稅充伊犁兵餉之用十一年廣東巡撫覺羅耆齡奏請抽收落地茶稅同治元年飭下湖南湖北江蘇安徽江西浙江福建各督撫詳查本省產茶及設茶莊處所妥議章程具奏二年兩江總督曾國藩疏略言江西自咸豐九年定章分別茶釐茶捐每百斤除境內抽釐銀二錢出境又抽一錢五分有零外向於產茶及

設立茶莊處所勸辦茶捐每百斤捐銀一兩四錢或一兩二錢不等填給收單
准照籌餉事例彙齊請獎臣仍照舊章辦理本年據九江關署監督蔡錦青詳
請遵照戶部奏准飭將鹽茶竹木四項統徵關稅已於三月起徵江西茶葉運
至九江有華商洋商之分洋商既完子口半稅固不抽釐華商既納潯關正稅
亦未便再令完釐臣卽照部章於義甯州開辦落地稅惟原奏內大箱淨茶料
則稍重分別核減參酌茶捐向章每百斤義甯州等處徵一兩四錢河口鎮徵
一兩二錢五分概充臣營軍餉由臣刊發稅單護票委員經收或業戶自行完
納或茶莊代爲完稅領單至發販時統由茶莊繳銷稅單華商換給護票洋商
卽憑運照販至各處銷售除華商完納九江關稅洋商完納子口半稅外經過
江西安徽各釐卡驗明放行如此辦理與戶部原奏總理衙門條約一一符合
稅單雖係茶莊經手稅銀實爲業戶所出洋商不得藉口於子口半稅而禁中
國之業戶不完中國之地稅華商既免逢卡抽釐亦不至紛紛私買運照冒充
洋商得旨允行五年戶部奏准甘省引滯課懸暫於陝西省城設官茶總店釐

關商州漢中設分店商販無引之茶到陝呈報上色茶百斤收課銀一兩年色六錢下色四錢所收解甘彌補欠課七年議准歸化城商人販茶至恰克圖假道俄邊前赴西洋各國通商請領部照比照張家口減半令交銀二十五兩每票不得過萬二千斤十一年議准甘省積欠舊課仍追舊商招募之新商試新課其雜課養廉充公官禮四項緩徵十三年議准甘省仿准鹽之例以票代引不分各省商販均令先納正課始准給票其雜課歸併釐稅項下徵收各項名色概予刪除行銷內地者照納正課三兩外於行銷地各完釐稅每引以一兩數錢爲度多不過二兩出口之茶則另於邊境局卡加完釐一次以示區別光緒十年戶部統籌財政於茶法略言據總衙門單開光緒八九等年出口茶數多至萬九千餘萬斤查道光年間英國所收茶稅約每百斤收銀五十兩而我之出口稅僅納二兩五錢不及十一擬照甘肅茶封之例每五十斤就圍戶徵銀三錢增課既多洋人無所藉口或照甯夏延榆綏等處茶引每道徵銀三兩九錢之例於產茶處所設局驗茶發給部頒茶照每照百斤徵銀三兩九錢經

過內地關卡另納釐稅驗照蓋戳放行不准重複影射所有茶照按年豫行赴督請領原照一年後作廢或於產茶處所驗茶發給部照既完課三兩再倍收銀三兩九錢前後共徵七兩八錢一切雜費均予豁免惟於各海關及邊卡凡應納洋稅仍照向章完納若在內地行銷販運無論經過何省何處釐卡關權均免再徵則改釐爲課改散爲總既便稽查復免侵漁惟園戶及販商若何防其走漏應令各省參酌定章覆奏辦理十二年以山西商人在理藩院領票詭稱運銷蒙古地方實私販湖茶侵銷新疆南北兩路一票數年循環轉運往往逃釐漏稅經部奏准嗣後領票註明不准販運私茶字樣如欲辦官茶卽赴甘肅領票繳課完釐倘復運銷私茶查出沒官是時泰西諸國嗜茶者衆日本印度意大利豔其利厚雖天時地質遜於我國然精心講求種植之法所產遂多蓋印度種茶在道光十四年至光緒三年乃大盛錫蘭意大利其繼起者也法蘭西既得越南亦令種茶有東山建吉富華諸園美利堅於咸豐八年購吾國茶秧萬株發給農民其後愈購愈多歲發茶秧至十二萬株足供其國之用故

我國光緒十年以前輸出之數甚鉅未幾漸爲所奪印度茶往英國者歲約七十三萬二千石價約二千四萬兩吾國茶往者八十九萬八千石價約千八百六十八萬兩印度茶少於華而價反多迨二十二年我國運往乃止二十一萬九千四百餘石而已日本之茶多售於美國亦有運至我國者光緒十三年我茶往日本者萬二千餘石而彼茶進口萬六千餘石其專尙華茶取用宏多者惟俄蓋自哈薩克浩罕諸部新屬於彼地加廣人加衆需物加多而茶尤爲所賴光緒七年定約允以嘉峪關爲通商口岸而往來益盛十年後我國運往之茶居全數三之一十三年併雜貨計出口價九百二萬兩有奇而進口價僅十一萬八千餘兩凡輸自我者八百九十萬兩然十二年茶少價多十三年茶多價少華商已有受困之勢厥後亦兼購於他國用此華茶之利驟減蓋我國自昔視茶爲農家餘事惟以隙地營之又採摘不時焙製無術其爲他人所傾勢所必至三十三年茶葉公會以狀陳於度支部稅務司亦以茶稅減少爲言於是命籌整理之策宣統初農工商部遂有酌免稅釐之議漢口福州皆自外國

購入製茶機器且由印度聘熟練教師江西巡撫又籌款貸與茶戶自是銷入歐洲及北阿非利加洲者乃稍暢旺夫吾國茶質本勝諸國往往澀味中含有香氣能使舌本回甘泰西人名曰膽念他國所產鮮能及此故日本雖有茶必購於我荷蘭使臣克羅伯亦言爪哇印度賜蘭茶皆不如華茶遠甚然則獎勵保護無使天然物產得被族人力所奪是不能不有望於今之言商務者

鑛政清初鑒於明代競言鑛利中使四出暴斂病民於是聽民採取輸稅於官皆有富率若有礙禁山風水民田廬墓及聚衆擾民或歲歉穀踊輒用封禁世祖初開山東臨朐招遠銀鑛八年罷之十四年開古北喜峯等口鐵鑛康熙間遣官監採山西應州陝西臨潼山東萊陽銀鑛二十二年悉行停止並諭開鑛無益地方嗣後有請開採者均不准行世宗卽位羣臣多言鑛利粵督孔毓珣粵撫楊文乾湘撫布蘭泰廣西提督田峻廣東布政使王士俊四川提督黃廷桂相繼疏請開鑛均不准行或嚴旨切責十三年粵督鄂爾達請開惠潮韶肇等府鑛下九卿議行上以妨本務停止蓋粵東山多田少而鑛產最繁土民習

於攻採鑛峒所在千百爲羣往往聚衆私掘聚剽掠故其時粵東開鑛較他省尤爲厲禁乾隆二年諭凡產銅山場實有神鼓鑄准報開採其金銀鑛悉行封閉先是五年允魯撫朱定元請開章邱淄川泰安新泰萊蕪肥城齊陽滕嶧泗水蘭山剡城費莒蒙陰益都臨朐博山萊陽海陽各州縣煤鑛而蕪城知縣高鈞請自備貲開嶧滕費淄沂平陰泰安銀銅鉛鑛則禁之然貴州思安之天慶寺鎮遠之中峯嶺陝西之哈布塔海哈拉山甘肅之扎馬圖敦煌沙洲南北山伊犁之皮裏沁山古內雙樹子烏魯木齊之迪化奎騰河呼圖壁瑪納斯庫爾喀喇烏蘇條金溝各金鑛貴州法都平遠達摩山雲南三嘉麗江之廻龍昭通之樂馬各銀鑛相繼開採嘉慶四年給事中明繩奏言民人潘世恩蘇廷祿請開直隸邢臺銀鑛上謂國家經費自有正供潘世恩蘇廷祿覬覦鑛利敢藉納課爲詞實屬不安本分命押遞回籍明繩下部議六年保寧以請開塔爾巴哈台金鑛明安以請開平泉州銅鑛均奉旨申飭道光初年封禁甘肅金廠直隸銀廠蓋其時歲入有常不輕言利惟雲南之南安石羊臨安箇舊銀廠歲課

銀五萬八千餘兩其餘金鑛歲至數十兩銀鑛歲至數千兩而止又旋開旋停興廢不常賦入亦鈔銅鉛利闕鼓鑄開採者多邀允准間有蠲除課稅者廣東自康熙五十四年封禁鑛山至乾隆初年英德陽春歸善永安曲江大埔博羅等縣廣州肇慶兩府銅鉛鑛均行開採百餘年來雲貴兩湖兩粵四川陝西江西直隸報開銅鉛鑛以百數十計而雲南銅鑛尤甲各行省蓋鼓鑄鉛銅並重而銅尤重秦鄂蜀桂黔嶺皆產銅而滇最饒滇銅自康熙四十四年官爲經理嗣由官給工本雍正初歲出銅八九十萬不數年且二三百萬歲供本路鼓鑄及運湖廣江西僅百萬有奇乾隆初歲發銅本銀百萬兩四五年間歲出六七百萬或八九百萬最多乃至千二三百萬戶工兩局暨江南江西浙江福建陝西湖北廣東廣西貴州九路歲需九百餘萬悉取給焉鑛廠以湯丹碌碌大水茂麓獅子山大功爲最甯臺金釵義都發古山九度萬象次之大廠鑛丁六七萬次亦萬餘近則土民遠及黔粵仰食鑛利者奔走相屬正廠岫老砂竭輒開子廠以補其額故滇省銅政累葉程功非他項鑛產可比道光二十四年詔雲

南貴州四川廣東等省除現在開採外如尙有他礦願開採者准照現開各廠一律辦理二十八年復詔四川雲貴兩廣江西各督撫於所屬境內確切查勘廣爲曉諭其餘各省督撫亦著留心訪查酌量開採不准託詞觀望至官辦民辦商辦應如何統轄彈壓稽查之處朝廷不爲遙制一時礦禁大弛咸豐二年以寬籌軍餉招商開採熱河新疆及各省金銀諸礦三年詔曰開採礦產以天地自然之利還之天地較之一切權宜弊政無傷體制有神民生當此軍餉浩繁左藏支絀各督撫務當權衡緩急於礦苗豐旺之區奏明試辦時軍興餉乏當時開採者僅新疆噶爾蒙古達拉圖噶順紅花溝之金礦直隸珠窩山徧山綫室溝土槽子錫蠟片牛圈子溝蒙古哈勒津羅圈溝庫察山長杭溝之銀礦新疆迪化羅布淖爾三個山之銅錫鑛數處同治七年吉林請開火石嶺子等處煤鑛以伏莽未靖格部議不果行十三年以滇鑛經兵燹久廢諭飭開辦從滇督岑毓英請也是年海防議起直隸總督李鴻章船政大臣沈葆楨請開採煤鐵以濟軍需上允其請命於直隸磁州福建臺灣試辦光緒八年兩江總督

左宗棠亦言北洋籌辦防務製造船廠及各省機器輪船所需煤鐵最爲大宗請開辦江蘇利國驛煤鐵報聞嗣是以次修築鐵路煤鐵益爲當務之急於是煤礦則吉林大石頭頂子亂泥溝半拉窩鷄溝二道河陶家屯石牌嶺黑龍江太平山察漢敖拉卡倫直隸開平唐山內邱縣之上坪永固磁窰濟南陽寨臨城縣之岡頭石固膠泥溝楊家清新莊竹壁牟村焦村宣化府之鷄鳴玉帶八寶寺山阜平縣炭灰鋪村曲陽縣白石溝野北村張家口廳海拉坎山馬連圪達宛平縣青龍溝碑碣子承德府榆樹溝奉天海龍府遠來義和進寶玉盛永順永益萬利人和同德順發錦州府大窰溝錦西廳碭石溝本溪縣王千溝興京廳蜜蜂溝遼陽州窰子峪江西萍鄉永新餘千山東嶧縣安徽貴池廣德繁昌東流涇縣湖北荊門河南禹州山西平定鳳台浙江桐廬餘杭江蘇上元句容湖南湘鄉祁陽廣西富川賀縣奉議恩陽南甯那坡陝西白水澄城同官宜君邠州隴州淳化鐵礦則直隸遷安縣灤州湖北大冶廣西永甯州江西永新縣雲南開廣兩府貴州青谿皆先後開採而秦晉商民零星開採尤難悉數二

十二年詔開辦各省金銀鑛廠自光緒初年開直隸蕙清銀鑛甘肅西寧甘涼黑龍江漠河觀音山奇乾河各金鑛外無聞焉自明令頒行而後金鑛則直隸之平泉州屬轉山子建昌縣屬金廠清撫寧縣屬雙山子深平縣屬寬溝豐寧縣大營子西碾子溝翁牛特旗之紅花溝水泉溝拐棒溝而遼安縣所產尤旺奉天之鳳凰安東遼陽通化寬甸懷仁鐵嶺開原通化海城錦縣蒙古之賀連溝大小槽碾溝除虎溝朱家溝板橋子珠爾琿珠克勒司布恭特勒基哈拉格囊圖奎騰河圖什業圖汗四川之冕溝湖南之平江浙江之諸暨黑龍江之黑河新疆之和闐焉耆銀鑛則四川之天全廬山大穴山頭皆報明開採而銅錫鉛銻石油硫磺雄黃等鑛亦接踵而起銅則雲南迤東湯丹茂麓正廠六子廠十一迤西回龍得寶正廠八子廠九楚雄永北及雲武所屬萬寶雙龍又永安順寧臨安開化曲靖各廠均招商承採而江西贛州陝西鎮安湖南綏寧新疆拜城庫車亦有銅廠錫則廣東儋州廣西南丹土州富川賀縣鉛則南南常寧湘鄉臨武四川會理浙江鎮海奉化象山寧海太平銻則湖南益陽邵陽新淮

沅陵慈利湘鄉祁陽新安溆浦貴州銅仁四川秀山廣東曲江防城乳源廣西
南太泗鎮陵陽都石油則陝西延長甘肅玉門新疆庫爾喀喇烏蘇硫磺則山
西陽曲奉天遼陽錦州雄黃則湖南慈利或官辦或商辦或官商合辦或用土
法或用西法九年詔各省煤鑛招商集股舉辦自是雲南四川均設招商及鑛
務局貴州設鑛務公商局山西設鑛務公司粵東瓊州之銅鑛浙江寧波之鉛
鑛皆率招商集股開辦開辦歷數十年惟開平萍鄉之煤大冶之鐵規模宏遠
次則平江之金益陽之錫常寧之鉛猶爲民利漠河金鑛所產雖富歲解部銀
僅二十萬兩滇銅自十三年命唐炯督辦歲運京銅不過百餘萬各省鼓鑄猶
以重直購洋銅鐵產爲漢陽廠鍊鋼造軌路供輸路之需粵桂晉出鐵雖饒以
提鍊不精國內製造仍多購自英廠二十四年詔設鑛務鐵路總局於京師以
王文韶張蔭桓主之奏定章程二十二准華商辦鑛假貸洋欸及華洋合股設
立公司自是江西萍鄉煤鑛則借德欸湖北大冶鐵鑛則借日本欸浙江寶昌
公司則借義欸直隸臨城煤鑛則借比欸當其議定合同於抵押息金外輒須

延聘鑛師甚者涉及用人管理至直隸井陘安徽宣城煤鑛山西孟平澤潞平陽四川江北煤鐵鑛新疆塔城直隸霍家地廠子溝金鑛廣西上思貴州正安鉛鐵福建邵武建寧汀州直隸八道河奉天尾明山及吉林新舊鑛均華洋合辦一經訂約時生軋輻若福公司之於晉鑛其尤甚者也二十四年河南豫豐公司以其專辦懷慶左右黃河以北各鑛之權山西商務局以其專辦孟平澤潞平陽煤鐵各鑛之權同時讓與辦理一公司壟斷兩省鑛務更議修鑛道自晉訖汴因鑛及路利權損失爭持三年始允合辦汴既侵攘華官主權晉復干涉人民開採全晉紳民堅持廢約遲之又久始以銀二百七十餘萬贖回他如陝西延長四川富順巴萬石油鑛湖南常甯龍王山湖北興國龍角山鑛均因商民私相授受釀成交涉自議訂膠濟東清路約附路十三里內華人無開鑛權而開平煤鑛漢河觀音山金鑛復因內亂爲外人所侵佔開平煤鑛自光緒元年直隸總督李鴻章集官商之力經營二十年效力大著二十六年拳匪亂後洋員德瑤琳因督辦張翼委其保護與鑛師胡華私立賣約而張翼亦卽簽

押移交轉以加招洋股中外合辦奏聞由是而唐山西山半壁店馬家溝無水莊趙各莊林西各鑛秦皇島口岸地畝附屬之承平建平永平金銀鑛悉操於英公司嚴詔責令收回赴英控訴卒未就緒三十四年籌辦灤州煤鑛英公司阻撓之乃切爲營業聯合之法合設開灤總局觀音山金鑛亦因拳亂爲俄人佔據三十二年始以俄銀萬二千盧布贖回二十八年外務部改定鑛章凡華洋商人得一體承辦鑛務惟必稟部批准乃爲允行之據是年皖撫聶緝契許英人凱約翰承辦欲銅陵大通甯國廣德潛山鑛產嗣以專辦銅陵之銅官山訂約定期百年佔地三十八萬四千餘畝皖中紳民合力爭之始以銀四十萬兩贖回自辦法人彌樂石亦於是年以勘辦全滇鑛務請於滇督及外務部皆拒之仍獲徵江臨安開化雲南楚雄元江永北等府廳州鑛權以去繼是英商立樂德以合辦東昭兩府金銀鑛不獲遂援彌樂石例索廣南曲靖麗江大理順寧普洱永昌七府鑛亦堅拒未允一時舉國上下咸以保全鑛產爲言由是蜀設保富公司華洋承辦川省鑛務購地轉租事宜屬之閩設商政局旋奏設

鑛務總公司凡請辦各鑛場查核准駁之權屬之山西保晉公司安徽鑛務總局類能集合殷富鳩貨開辦湘鄂則於所屬鑛地勘明圍購以杜私售二十五年江南籌辦農工鑛路各學堂兩湖復籌設高等鑛業學堂三十一年商部以洋商私佔鑛地鑛山疏請申明約章以維權限尋奏設各省鑛政調查局以勘明全國鑛產嚴禁私買爲先務鄂督張之洞條上鑛務正章七十四附章七十三蓋自二十四年以來鑛章屢易每因鑛務齟齬洋商輒引爲口實二十九年商約大臣呂海寰與各國議訂商約許以開採鑛產之利但必須遵守中國鑛章而中國鑛章則比較各國通行者爲之準則特詔張之洞擬定乃取英美德法比利時西班牙鑛章參互考証區別地面地腹釐定鑛界鑛稅分晰地股銀股暨華洋商限制至周尤注重於中國主權華民生計地方治理閱數年乃成下部議行中國鑛章始具云

清史稿

志

食貨六

征權

會計

征權清興首除煩苛設關處所多仍明制自海禁開常關外始建洋關而釐局之設洋藥之徵亦相繼而起三者皆前代所無茲列著於篇至印花稅煙酒加徵均試行旋罷不具載常關順治初定各省關稅專差戶部司員督徵左右兩翼張家口稅差滿官督徵時京師初定免各關徵稅一年並豁免明季稅課虧欠嗣浙閩以次蕩平復禁革明末加增稅額及各州縣零星落地稅三年革明末加增太平府姑溪橋米稅金柱山商稅四年定戶工各關兼差滿洲漢軍漢官八年減定關差員數並停止關差議叙九年併西新關江寧倉爲一差停獨石口差嚴關差留用保家委官之禁凡額設巡攔各製號衣腰牌十年令各關刊示定則設櫃收稅不得勒扣火耗需索陋規並禁關役包攬報單十一年用給事中杜篤祐言清釐關弊四事一裁吏役一查稅累一關差廻避本籍一批

文核對限期十六年移潘桃口於永平移古北口於密雲並設關徵木植稅十分取二十七年裁永平密雲新關歸併古北口兼督管理二十八年定各口木植什一而稅停臨清甄差其板關稅交北河公司徵收康熙元年移設河西務於天津更名天津關更定各關兼差滿漢官筆帖式各一由六部咨送輪掣傳蒙古漢軍差其張家殺虎二口專差滿蒙官二年定盤詰漕船止於儀真瓜州淮安濟甯天津五關免外國貨物入崇文門稅四年嚴禁各關違例徵收永免溢額議叙之例五年命各關稅均交地方官管理於是崇文門歸治中天津歸天津道龍泉等歸井陘道紫荆歸直隸守道臨清歸東昌道空運廳歸通薊道居庸歸昌密道西新歸鎮江道蕪湖歸池太道揚州歸驛傳道潯墅歸蘇昌道淮安歸淮海道北新歸浙江布政使荆歸荊州同知九江歸九江道贛歸吉安贛道太平橋歸南雄知府遇仙橋治光廠歸韶州知府各稽徵稅課又裁古北口差歸密雲縣管理惟兩翼張家口殺虎口如故只差戶部司員申令直省關刊示稅則罷崇文門出京貨物稅八年臨清倉歸併臨清關以給事中蘇拜言

地方官兼關稅事務繁多且恐畏懼上司希圖足額派累商民復定稅額較多之濟甯蕪湖北新九江淮安太平橋揚州嶺西新臨清天津鳳陽倉仍差部員督徵餘如故是年定關差缺出以六部俸深司員輪掣其差過之員不准重差又定關差考覈法欠稅不足半分者罰俸半分至四分分別降調五分以上革職旋又定不及半分者降留全完者紀錄凡部差官員不令督撫管轄九年定淮安關兼轄淮安倉及工部清江廠兩翼專差滿官筆帖式十年裁西新戶關歸併龍江工關裁蕪湖工關歸併蕪湖戶關各兼理既而改鳳陽倉歸鳳陽知府正陽歸通判臨淮交大使徵收停差部員十七年裁北河分司臨清關稅歸濟甯道兼管十九年開山東海禁令查船戶課稅差滿部員督收潼關山海關稅課潼關兼轄大慶關龍駒寨稅務二十一年移九江關駐湖口停潼關山海關部員差仍歸地方官管理鳳陽仍差六部滿員二十三年更定各關輪差各部院司員例是時始開江浙閩廣海禁於雲山寧波漳州澳門設四海關關設監督滿漢各一筆帖式期年而代定海稅則例免海口內橋津地方抽稅分設

西新龍江二關課稅專官二十四年西新仍歸戶部免外國貢船稅減洋船丈
抽例十之二三十五年定州縣海船隱匿處分時海禁初開沿海漁船州縣既
徵漁課海關復稅梁頭民甚苦之上用福建巡撫張仲舉言定漁船五尺以上
梁頭稅統歸地方官徵收先是康熙四年罷抽稅溢額議叙例至十四年又定
溢額多寡分別加級升用及是上以苛取累商復停止溢額議叙二十六年濟
甯監督桑額徵收溢額二萬一千有奇上以擾累閭閻罪之永減閩海稅額六
千四百兩有奇二十八年蠲沿海魚蝦船及民間日用物柁口貿易之稅著爲
令先是沙溝於二十六年歸併准關其朦朧軋東岔河等處悉免稽查至是以
沙溝係朦朧軋東總匯不宜再增一稅將朦朧歸海關軋東歸准關沙溝免稅
復歸併西新戶關於龍江工關三十三年仍差部員督收山海關稅張家口稅
歸宣化府兼收三十四年分設浙海關署於寧波定海令監督往來巡視三十
五年定洋海商船往天津運米至奉天者但收貨物正稅三十六年嚴關差官
自京私帶年滿舊役謀佔總科庫頭之禁三十七年永減粵海關額稅三萬二

百兩有奇三十八年上恐各關差苛取瘠商停罷額外盈餘銀設河寶營差滿官督收大青山木稅四十年裁陝西三原縣商稅歸潼關龍駒寨大慶關兼收裁通會河分司通州木廠歸通水道管理四十一年大青木稅歸併殺虎口兼轄四十六年以金州牛莊交山海關監督巡察越關漏稅設渝關於重慶歸川東道徵收木稅四十七年仍差工部司員督收荆關稅五十三年以臨清關稅闕額改歸巡撫監收未幾鳳陽天津杭州荊州江海浙海淮安板閘及淮關先後改交各巡撫監收停瓜州稅裁稅課大使定臺灣收泊江浙等省商船經過廈門就驗者不重徵福建糖船至廈門者赴關納稅其往江浙貿易者免徵設橫城稅口歸山海關監督監收增稅千兩作爲定額六十一年禁各番部落夾帶硝磺軍器出邊其進口稅許從輕減雍正元年移湖口關於九江並設大孤塘分口裁淮安北新鳳陽天津臨清江海浙海荊州各關加增贏餘銀嚴禁各省關及崇文門胥役分外苛求是年定各關稅務俱交地方官管理惟崇文門仍差內務府官山海關兩翼古北潘桃殺虎三口暨打箭鑪仍差部員盛京呼

納呼河木稅亦交將軍府尹委沿河官徵收明年淮安仍差部員游擊改歸蘇州織造鳳凰城中江稅派盛京部員各督收河西務運糧船料改於通州徵收三年以暹羅進獻稻種果樹等物免回空壓載貨物稅禁邊關城門索取蒙古貢物稅其假名匿稅者罪之五年宿遷關歸併淮關徵收由牘稅交地方官管理河寶營木稅由殺虎口監督徵收奉天牛馬稅改差部院司員六年更定臨清關米麥雜糧船稅定各關稅則龍江西新二關交江甯織造兼管永免暹羅米稅七年夔州關改委專員督收南北二新關交杭州織造兼收移荊州之徐關於田家洲更名川關江蘇廟灣稅歸淮關兼管定閩海關減折船稅丈尺例裁古北口監督交密雲縣徵收以潼關商稅浮於部例相安已久照現徵之數著爲令移潘桃口正關於潘家桃林二分口徵收八年減各關餘平銀之半革除天津毀耗例外徵收定落地稅搜求溢額議處嚴黃金出洋之禁十年設交城縣水泉灘木廠武元城設立稅口徵收十一年改天津關歸長蘆鹽政管理十二年設居庸關稅課大使定潘桃古北殺虎三口給商印票兼滿漢蒙三

體文字山東海口各州縣衛設兩聯印票填註客商年貌籍貫船隻字號梁頭丈尺豆石數目出口年月分給商船回日查銷乾隆元年革除龍江西新二關衙規票銀初外洋夾板船到粵起其礮位候交易事畢給還其稅法每船按梁頭徵銀二千兩左右貨稅照則徵收革除額稅外另徵置貨銀加一繳送稅定閩省漁船稅分上中下三則起科除額外重徵定各省稅課則例頒行定九江贛州二關三聯稅單例一給商人一交撫署一存稅署准張家口居庸關收取車駁貨物過稅飯錢以資養贍禁偷運米穀接濟外洋分別擬罪有差免沿海採捕魚蝦單桅船稅二年定米穀稅凡遇地方旱澇米穀船到卽放行俟成熟後照舊徵收永停徵廣東開建恩平二縣米船稅三年裁濟甯關之轉水柏瀆二口改瓜州由關稅歸兩淮鹽政九江差內務府司員蕪湖鳳陽派部員各管理監督四年定歸化城木稅額歸殺虎口徵收五年復差部員監督荆關用御史陸尹權言嚴捏名討關之禁六年復定考覈關稅贏餘例清查外省私增口岸免領帑採銅錫鉛及米穀稅仍徵船料惟黃豆非麥稊比雖歉歲照常徵收

改宿遷之豐沛蕭陽四縣陸稅仍交各縣分徵永禁龍江關木稅飛量法定各關贏餘比較上年數目考核著爲令七年永免直省關豆米額稅復設通州分司之黃村臨清關之德州魏家灣尖冢樊口等口岸免徵臨清關船料以揚州關歸兩江總督遴員徵收停止閩海關之南山邊口徵稅專司稽查八年定官運米穀免徵船料九年嚴蒙古來京漏稅及爲奸商私運貨物之禁十年交陞亂平復開徵雲南馬白稅禁止宿遷關通船一載收稅例改按擴數徵收定一官兼管兩關其徵額有此贏彼絀者准其抵補再有短歛仍著追賠移福建詔安之雅溪稅館於懸鐘以閩省舊有舢子頭船包攬走私永禁製造十三年復徵米豆稅十四年定各關贏餘以雍正十三年爲准短少者按分數分別議處罰俸降調有差十五年移福建寄德縣稅口於酒嶼十七年改渝關木稅歸併夔關徵收十八年移廈門查稅之玉洲館駐石美鳳陽關查稅之滙陽口駐虹縣改虹縣徵稅之青陽鎮駐滙河口二十年移淮南關之流均口駐涇河二十二年增定浙閩二海關稅則照粵海關例尋又申禁洋船不准收泊浙海有駁

至者仍令回粵貿易納稅二十四年定葉爾羌喀什噶爾牲畜稅二十取一緞布皮張稅十之一自外番販入者倍徵嚴絲斤出洋之禁二十五年始派員徵收多倫諾爾皮張等稅並設盛京拉林阿勒楚稅局派員徵收如寧古塔伯都訥例革除粵海關陋規銀歸公造報二十六年設淮安關石碓稅口又設歸化城總稅局並綏遠歸化和林格爾托克托薩拉齊西包頭崑都崙八十家子等口差蒙古筆帖式二員分督徵收牲畜稅二十七年以龍江淮安二關歸兩江總督濟甯歸江蘇巡撫各稽查嚴禁權關漏稅積弊並定漏稅罰數江蘇巡撫陳宏謀條上濟甯關四弊一舖戶代客完稅包攬居奇仍令商人自行完納按簿親填一貨船抵關籤驗納稅給票後始准過關以杜偷越一官員遴委佐雜官半年而代一督撫與監督原相助爲理所徵數目應令監督按月知會督撫再於年滿奏報時統咨知會從之是年弛絲斤出洋之禁仍示限制定崇文門兩翼稅差期滿由部開列滿蒙大學士尙書都統侍郎副都統等職名請簡更代遂爲永制二十八年畫一天津各口稅則定商販山東豆石由海運浙照運

赴江南例輸稅張家口出口鐵器照殺虎口例納稅革除蕪湖關之戶工幫貼飯費江海關之駁票給單挂號油燭飯費看驗艙錢文揚關由關之給串錢二十九年更定臨清關船隻補稅例定外番商貨至回部貿易者三十抽一皮貨二十抽一回商往外番貿易二十抽一皮貨十之一其牲畜貨物不及抽分之數視所值折算三十年更定吉林等處稅額裁潘桃口監督稅歸張家口徵收所屬六小口改歸通永道管理明年復改潘桃口稅歸多倫諾爾同知徵收設局大河口差理藩院司員督收歸化城稅既而改歸山西巡撫遴員徵收岫巖城屬之鮑家馬頭等七口岸海船商稅歸山海關監督設局徵收三十三年定山海關張家口八溝塔子溝三座塔烏蘭哈達多倫諾爾交直隸總督殺虎口歸化城交山西巡撫盛京牛馬稅中江稅交盛京戶部侍郎坐糧廳交倉場侍郎打箭鑪交四川總督荆關交湖廣總督均兼管稽差各監督有侵蝕情弊參處後不能完項者卽令兼管之員代賠三十四年准九江關正稅一兩加平餘一分以供飯食費需用停洋船入口夾帶硫磺之禁著爲令三十五年裁潯

梧二廠公費歸入正稅三十八年裁多倫諾爾監督歸多倫諾爾同知管理移由開南壩稅口於中開四十年封閉廣西山村溢口禁內地商民越關交易四十年改通州分司及河西務計價科稅爲計數科稅並革除張家灣油麪等出店進店稅改定打箭鏹商貨按數徵稅例明年定打箭鏹稅差照山海關例於宗人府及部院司員內選派四十五年停荆關打箭鏹司員差交各督撫遵員管理四十六年裁荆關監督養廉銀於荆宜施道荆州知府遴派一員監收四十九年定粵海關珍珠寶石概不徵稅著爲令五十一年裁荆州之郝關及郝支關另設口於越市更名越關移楊關於調賢口更名調關定除暹羅貢使船外其帶貨私船照例徵收五十二年定各關預期請領收稅册檔及請領運延擅用本關簿册參處例以安南奉貢請封弛水口等關之禁越四年緬甸效順亦准開關通市於永昌騰越順寧收徵出口稅杉木籠眷福南河口徵收入口稅以福建五虎門與臺灣淡水八里坌設口開渡由閩安鎮徵收進口稅南臺口徵收出口稅貨物進口復運往他處限一月內免重徵若逾限出口或限

內移貨別船均徵出口稅五十七年定粵海關到關船貨責成督撫查明按月册咨一年期滿與監督清册數對不符參辦五十八年定西洋除貢船外別項商船不得免徵以杭州織造改歸鹽政南北二新關交巡撫管理開山西得勝口歸殺虎口監督稽徵時英吉利貨船求往江浙寧波珠山及天津廣東等處收泊交易上不許仍令照例於澳門互市向粵海關納稅並徵船料嘉慶二年併左右翼爲一差越二年復簡派二員定辰關渝關潘家口通水道古北口五處各關例是年命覈減各關贏餘額數於是定戶關之坐糧廳六千兩天津二萬臨清一萬一千江海四萬二千濟甯二十三萬五千淮安十一萬一千海關廟灣口二千二百揚州六萬八千西新二萬九千九江三十四萬七千八百贛關三萬八千閩海十一萬三千浙海三萬九千北新六萬五千武昌一萬二千夔關十一萬粵海八十五萬五千五百太平七萬五千五百梧州七千五百潯州五千二百歸化城一千六百山海關四萬九千四百八十七殺虎口一萬五千四百十四張家口四萬五百六十一打箭鎗儘收儘解工關之辰關三千八

百兩宿遷七千八百蕪湖四萬七千龍江五萬五千荆關一萬三千通水道三千九百閩南新淦三關潘桃古北殺虎三口竹木稅向無贏餘無庸更議五年議准回空漕船於六十石例額外夾帶二十石均免輸稅嚴禁崇文門蘆溝橋及各省關役訛索行旅以辰州知府李大讓接管稅額外贏餘萬兩有奇下部議叙六年定盛京牛馬稅差於盛京五部侍郎內簡派定打箭鑪正稅額二萬兩革除閩海徵收二八添平銀七年改密雲縣徵收古北口木稅爲儘收儘解並繳銷原額監督關防九年復增定各關贏餘額數浙海四萬四千西新三萬三千九江三十六萬七千濟甯二十五萬淮安十三萬一千十一年定辰關歲徵加一耗銀二千七百七十餘兩十五年定崇文門羨稅則例令營汛官分查崇文門私放私收冒充白役之弊二十二年飭各海關查禁例不出洋之貨道光元年裁浙江鹽政改設杭州織造兼管南北新關稅務三年飭各省關整頓奸盜包攬書吏徇縱等積弊嚴各關員例外橫徵及楫船夾帶偷漏之禁定多偷諾爾木稅更定浙海關稅則九年申定回疆稅課三十抽一時英吉利大班

等以洋行閉歇拖欠貨銀商船停泊外洋延不進口每言在粵海關年納稅銀六七十萬以爲居奇上曰洋商私帶鴉片入口偷買紋銀出洋得不償失倘故刁難卽不准開艙少此一國貨稅所損幾何至請分別商船大小納餉尙可變通十年定各關盈餘銀以六成爲額內四成爲額外覈其溢額細額分別功過例先是御史許乃濟言崇文門稅局需索曾令巡視五城御史隨時稽查至是御史晉昌復言巡役勒索胥吏買放特派滿漢御史各一專司稽查一年而代十一年減濟甯盈餘二萬兩淮安二萬一千兩定賠繳短徵關稅按數多寡分別限期久暫例命廣東嚴緝快蟹船爲洋商運私偷稅十二年停止白鉛出洋十三年革除各關標禮並查船謝儀及地棍報單等名目以霍罕悔罪輸誠復准入卡貿易並免稅課十四年嚴禁各關家丁需索賣放及書役盤踞地棍包攬之弊又查禁粵商增收洋商私稅定貢物到京崇文門免稅驗放十七年嚴禁紋銀出洋查辦粵省匪艇及罌口走私漏稅十九年設韶州東江二關歸南韶連道管理二十一年移設荊州正關於柳家集更名柳關並改支關爲柳支

關二十四年免暹羅接正貢使船貨稅二十五年裁龍江關查驗木植稅局咸豐二年查禁沿海各關走私積弊三年以擒匪擾江南濟甯淮安蕪湖鳳陽等關紛請儘徵儘收漫無限制令仍遵定額照常徵收六年定打箭鎗稅額二萬兩八年定盛京盈餘稅以錢抵銀及漁船大小牛船交納船規例九年設山東煙臺稅局十年以士子會試入京照例驗放嚴禁崇文門巡役訛詐更定奉天海口稅則增收黃豆餅包頭油筊四稅加贏餘八萬兩又定各關監督未及一年離任者交後任接徵扣足一年分晰彙報例革除北新關南北二口貨稅過關五日十日之限是年俄羅斯於黑龍江互市免稅課同治二年免巴爾楚克過稅加徵葉爾羌正稅三年設福建臺南之打狗口海關歸巡撫管理暫停北新關徵稅四年暫停龍江西新關濟甯三關徵稅湖北新關竹木稅遵本省道府一員督徵先是粵海關額徵常洋不分至是定貨由華船裝運者爲常稅額徵五萬六千五百餘兩贏餘十萬兩再有贏餘儘徵儘解是年裁革太平關文武各署規費並飭粵海關嚴查各口偷漏隱匿裁山海關監督改設奉錦山

海關道稽徵七年定太平關歸南韶連道專管其四分廠委員仍由巡撫選派八年申定貢物解京崇文門放行毋許留難勒索十一年停江蘇淮關傳辦活計光緒二年復開蕪湖鳳陽兩關三年嚴定考核各關章程四年定輝發穆欽等處及寧古塔三姓稅務均由吉林將軍委員徵收山西交城縣木稅由知縣設口於武元城故交村徵收八年定蕪湖關稅額十三萬六千餘兩九年中江稅務改歸東邊道徵收十三年改廣東黃江廠稅委員專管裁廠書簽子官房總散房名目並革除額外加平辦用官錢鰲頭船錢墟艇錢黑錢包攬錢七項陋規榜示通衢定梧潯二廠贏餘六萬兩改滬尾打狗兩關歸臺灣巡撫監督二十五年勅各將軍督撫綜核各關卡陋規中飽之數酌量歸公勸限稟報三十四年減崇文門華商稅爲值百抽三如洋商稅例免日食蔬菜等物稅宣統元年設立吉林省稅務處分設稽徵庶務支應核銷四所所有指稅各局所公同概行裁撤歸併更定四川常關徵收章程及辦事規則洋關之設自五口通商始前此雖有洋商來粵貿易惟遵章向常關納稅而已道光十九年有躉船

繳煙之役是秋各商船來粵者皆爲英兵船所阻不得入口粵海稅課以洋貨爲大宗至是徵收短絀二十二年秋英人要求通商口岸允於沿海廣州福州廈門寧波上海五口開埠通商明年定洋貨稅則值百徵五先於廣州上海開市洋貨進口按則輸納後由華商運入內地所過稅關只照估價若干每兩加稅不過某分二十四年定法商條約一允法人赴五口通商船隻不得進別口及沿海岸私行交易違者貨沒官一法商出入五口照則輸貨稅船鈔外不再收別項規費一商船進口二日不繳船牌貨單由領事照會海關者每逾一日罰洋五十元但不得過二百元倘未領海關牌照擅自開船卸貨罰銀五百元貨並沒官一船進口未卸貨在二日內可往別口卽在彼口納稅一船進口二日外全完船鈔百五十噸以上噸納銀五錢以下噸納一錢一估價之貨有損壞者得核減稅銀一船進口按卸貨之多寡輸納餘貨如帶往別口卸賣卽在彼口輸稅二十五年定比利時商約照章納稅輸鈔二十七年定瑞典那威商約稅鈔亦如之咸豐四年設江海關於上海八年復定英約一牛莊臺灣登州

潮州瓊州等口均准開埠通商一值百抽五之貨多有價值漸減者應將舊則重修此次新定稅則如欲重修以十年爲限須先六月知照否則照前章完納復俟十年一子口稅按值百抽二五如願一次輸納洋貨在進口土貨在經過第一關納稅給票後他口不再徵一英船納鈔給照後四月內不重徵一貨船進口二日卽全納鈔一英商自用艇如帶例應納稅之貨每四月納鈔一次一商貨納稅後改運他口係原包免重徵是年允法商於潮州瓊州臺灣之淡水登州江甯通市納稅輸鈔均同有約國九年設粵海關於廣州允俄人於上海寧波福州廈門廣州臺灣瓊州七口通商稅則視各國例定美約亦如之並允於潮州臺灣兩口開市照新章完納稅鈔十年設潮海關於汕頭允英人於漢口九江通商以英人李泰國爲總稅務司幫司各口稅務設天津牛莊登州三口通商大臣十一年設浙海關歸寧紹台道監督津海關歸通商大臣統轄並設閩海鎮江九江三關定各國洋稅自上年八月始每三月結報一次四結奏銷一次英美二國於九江漢口開埠俄亦於漢口通商於是定長江及各口通

商章程洋貨入江於上海納正稅及子口稅土貨出口納出口稅復進口時完
一正稅准扣二成若完半稅不扣二成再入內地仍照納稅釐又定德商約其
稅約與英同同治元年設廈門關以五口商務歸通商大臣兼理二年設東海
臺南淡水三關免英租界洋貨釐金並准添開宜昌蕪湖溫州北海四口岸其
沿江之大通安慶湖口武穴陸溪口沙市均准英輪船暫時停泊用民船上下
貨物除洋貨半稅單照章查驗外土貨只准上船不准卸賣又英商自置土貨
非運出海口不得援子口半稅例是年定麥丹及荷蘭商約輸納稅鈔如英例
三年設山海關於牛莊定日斯巴尼亞稅則視咸豐八年各國例明年定比約
稅鈔亦如之又改定法船鈔章程凡商船進口已納稅往他口並往來安南之
法國各埠與附近之日本碼頭由海關給照逾四月再納鈔初粵海關稅常洋
不分至是始定由洋船裝運者爲洋稅五年定義商約稅鈔商船入口漏捏者
罰船主五百兩餘如法約八年定奧商稅鈔均視義約又定俄商約一邊界百
里內及往蒙古各盟貿易者不納稅一俄商運貨至天津納進口稅減三之一

其酌留張家口之貨納正稅如再運赴通州天津不再徵並將張家口多納之
一分補還一由天津運俄貨至各口須補足減一之稅他口不再徵如由他口
復入內地另納子口半稅一運土貨及洋貨由水路進口納稅視各國例一在
天津通州運土貨由陸路返國照例納正稅不再徵沿途不得銷買一在津運
復進口土貨由陸返國納稅後限一年起運不再徵並給還復進口稅沿途不
得銷賣一在津或他口運別國貨由陸返國已交正稅子稅不再徵如只交正
稅應補交子稅一議定稅章試行五年限滿欲修改先六月照會九年設江漢
關裁三口通商大臣東海山海二關均歸直隸總督統轄另設津海道監督新
鈔兩關光緒三年設蕪湖宜昌二關歸徽甯池太廣道荆宜施道各監督瓊海
北海二關歸粵海關兼理又設甌海關於溫州六年續定德商約一中國允除
宜昌蕪湖溫州北海前已添開岸並沿江之大通安慶湖口武穴陸溪口沙市
前已作爲上下客貨之處外又允德船於吳淞口停泊上下貨物一夾板進口
停泊十四日應納減半之鈔一船貨報關有漏捏應罰船主不得過五百兩一

德商運土煤出口噸納正稅三錢一無照冒充引水者罰銀不得過百兩一船
隻損壞准在各口修理飾詞偷漏罰倍圖免噸鈔之數一中船挂德旗而德人
知情與德船掛中旗而貨主知情貨均沒官是年定美商約稅鈔視各國例七
年設嘉峪關歸安肅道監督改定俄陸路商約一俄貨至嘉峪關照天津關例
納三分減一之稅再運內地納稅亦視天津例一貨至天津與原照不符者沒
官查僅繞越避查驗者罰令完一正稅一在通州運土貨回國完出口正稅在
張家口運回暨在內地運土貨至通州張家口回國者均納子口稅沿途不得
售賣餘同前約十二年復定法商約一中國准於北圻界擇開兩處通商設關
徵稅一洋貨入雲南廣西兩邊關納減半正稅三之一一洋貨入此關納稅轉
往彼關者三十六月內不再徵如轉入各口另納正稅土貨在此關納稅復轉
彼關只徵復進口稅如轉入各口另徵正稅入內地仍納子口稅一進出口貨
到關逾十八時不報驗日罰五十兩惟不得過二百兩報有漏捏貨並沒官餘
同前約十三年允法人於廣西之龍州雲南之蒙自及蠻耗開埠通商並減洋

貨進口稅十之三出口稅十之四尋改釐耗爲河內並添雲南之思茅口岸由通商各口運土貨前往四口時徵出口十成正稅到四口照十分減四徵復進口半稅又定葡約其稅鈔及罰例均視上年法約是年設拱北關於澳門九龍關於香港由粵海關監督改臺南淡水兩稅歸臺灣巡撫監督十五年設鎮南蒙自二關十六年設重慶關二十年開西藏之亞東關允英通商除禁運貨物外自開關日始免進口稅五年限滿再定稅章照納又允由蠻允蓋西兩路販運各貨限六年內減進口稅十之四二十一年設思茅關及猛烈易武二分關歸思茅同知兼理二十二年定日本商約一進出口貨視各國例只輸進口或出口稅一已進口貨再運各口不論貨主及運貨係何國人及何國船所有鈔稅釐金雜派各項一概豁免一運貨入內地再納子口稅係免稅者按值百抽二五一出口土貨完正稅子稅後限十二月運往外國如係禁運出外洋之物出口時只完正稅一洋貨已完進口稅三年內復運出口不再徵一船鈔視各國例是年設杭州蘇州及沙市三關明年設梧州三水二關並甘竹江門二分

關改定英人長江通商章程一在長江貿易輪船由上海稅務司給專照年換一次或在漢口及宜昌換領亦可船鈔在給照之關交納違者照罰再犯繳銷專照一撤銷出口正稅復進口半稅同時完納之例有專照江輪出口及復進口稅照各口例在裝貨起貨之口分次完納至裝貨撥貨卸貨亦如各口例二十四年設岳州關及江海之吳淞分關明年設膠州關與德會定徵稅辦法一青海設關應揀派德人充稅務司一海運進口之貨不徵稅若膠州界口運赴內地徵進口稅惟無海關准單不准出膠州界一土貨陸運入租界再水運他口徵出口稅惟租界內產土貨並土產及海運入口之物料製成各貨出口時不徵一土貨進口復運內地照約納稅一土貨納出口稅復運他口納半稅又定韓暨墨國稅鈔及各費悉視海關例是年設金陵關又設福海關於三澳二十六六年設騰越關及蠻允弄璋二分關二十七年定常關距口岸在五十里內稅由洋關兼徵二十八年設秦王島分關先是商約大臣盛宣懷並輯藥等言稅務司赫德等擬洋貨進口稅援照洋藥稅釐並徵之法核估時值按正稅子

口稅七二五統加釐金一倍爲值百抽十五由海關並徵以免各處釐局留難紛雜貨可暢銷洋商或可允從並擬出口土貨向完半稅者改完釐金以抵洋貨釐捐改歸海關並徵之數於各省釐金亦無所損上以此事利害出入關係甚大下南北洋大臣各督撫參酌各省情形妥議具陳至是始與英定裁釐加稅之約一約欵照行時中國允除現有各常關外向設各釐卡及抽類似釐捐之關概行裁撤一英國允於進口洋貨增至切實值百抽五加一額外倍半之稅以抵撤釐金子口稅及各項稅捐至土貨出口稅總數不得逾值百抽七五之數一現有常關仍舊存留其有海關而無常關及沿海沿邊非通商口岸處均可添設常關如新開口岸應設海關者可併設常關一民帆各船運貨所納出入口稅不得少餘輪船進口正稅及添加稅之總數土貨運出至第一常關照海關例徵出口加稅給照單限一年內無論經何關出口不再徵如運出各租界外銷售應納銷場稅一土貨運出除正稅外加徵半稅以爲裁撤釐捐之抵補至絲斤出口正稅不得逾值百抽五之數一向不出洋之貨於銷售處徵

銷場稅凡民船運至口岸之土貨將銷售本地者無論貨主何國均徵銷場稅惟不在租界內徵收一華洋各商在內地用機器紡織之紗布只納出場稅餘概豁免凡機器織成類似之洋貨視此惟漢陽大冶鐵廠及國有免稅各廠與後設之製造局船澳等廠所出物件不在此例尋與美日大西洋各國均定此約卒以事費調查迄未能實行也二十九年與俄協定北滿稅關試辦章程一鐵路運貨減三之一納稅指定界限按車站大小四面各距十里或五里三里不等如運出指定界限外應補足正稅並照運貨入內地章程辦理一鐵路運貨減價此中俄特約除俄貨外各國貨經東省鐵路運入者准此一章程稅項有應更改者俟一年再商定又定通商進口善後章程一進口洋貨稅則不載者照值百抽五例按市價估貨以市平合足關平並扣除使費方爲貨物實價一貨未報關已售於華商卽視合同價值之總數爲市價一由海關估定之價與該商不合卽由海關與該商本國領事並領事各派一人公同斷定若查出該商所報每百少至二十四兩按估定價值徵正稅並按所報應完之正

稅割繳四倍一洋船專載免稅之米糧等仍稅鈔是年設澳門分關三十年與德會定青島設關徵稅辦法附件一無論華洋輪船行駛內港應領關牌一年而易初次納牌費十兩換領只納二兩每四年納鈔一次明年與德修改青島徵稅辦法一改青島口岸概行免稅惟擇定稅界內一區爲無稅地餘均起徵一無稅區外製成各貨出口納稅不得逾運原料應完之稅數改三水之江門爲正關三十三年設南甯大連二關又設安東關及大東溝分關三十四年設濱江關及滿洲里綏芬河二分關宣統元年設愛琿三姓二分關二年設琿春關及延吉分關三年更定東海關各口稅則爲值百抽二五再收一二五內地捐所有規費概行裁免自光緒二十二年裁撤臺南淡水漢城各關外爲關二十七宣統三年續增南甯梧州三水岳州福海吳淞金陵膠海騰越江門安東大東溝大連濱江滿洲里綏芬河愛芬三姓琿春延吉等爲關四十七先是土藥各稅列入進口同治十二年始列專款合計洋關歲徵各稅咸豐末年只四百九十餘萬同治末年增至千一百四十餘萬光緒十三年兼徵洋藥釐金增

爲二千五十餘萬三十四年增至三千二百九十餘萬宣統末年都三千六百十七萬有奇爲歲入大宗云釐金抽捐創始揚州一隅後遂推行全國咸豐三年刑部右侍郎雷以誠治軍揚州始於仙女廟等鎮創辦釐捐是年蘇常疊陷丁清無收乃設釐局於上海藉資接濟又設江北釐捐歸大營糧臺經理五年江西設六十五局卡湖北設四百八十餘局卡湖南亦設城內外總分各局江蘇揚常鎮各府屬添設小河口普安新港三江營荷花池五局御史宗稷辰言大江南北設卡過多收捐太雜刑部左侍郎羅惇衍亦言泰州仙女廟釐局官紳弁兵刁難勒索上令酌量裁併嚴禁查辦六年盛京抽收商貨及糧石捐值百取一吉林亦如之烏魯木齊之吐魯番亦抽收棉花釐金七年設湖北釐金總局八年定豫省釐捐除水煙藥材茶葉外餘概不抽收並裁撤陝州荊子關及沿河各局卡是年福建廣西均設局卡抽收貨釐九年登萊青二府屬海口設局抽釐山西設籌餉局收行商藥稅及百貨釐捐於各隘口設七總卡及各分卡十年以張家口辦理釐金不善激成事變文武各員俱獲嚴譴兩江總督

曾國藩以湘軍援鄂請於長沙設東征局克復一處卽酌添局卡以濟軍儲凡貨物皆於本省釐金外加抽半釐尤之是時江北八里舖及廣東韶關肇慶府俱設局卡抽釐十一年改山西行商藥釐爲稅安徽抽收釐金設立正卡省局所屬四皖南及淮北局屬各三並設分卡分巡五十九貴州亦設貨釐局於川楚鄰近之區時各省釐局過多上恐有累商民命除各省通衢要口外其餘局卡概行裁撤同治元年以廣東官紳辦理釐捐營私病民特命三品京堂晏端書駐紮韶關督辦廣東釐金四川總督駱秉章亦以粵省釐捐積弊爲言上誠端書以釐捐原出於不得已總期有益軍餉無戾民情御史丁紹周言釐捐各委員徒事中飽民怨沸騰命裁革各委員統歸地方官管理其通都大邑捐釐事繁著派道府等官辦理並照部章分晰開載榜示通衢是年設江寧大勝關釐卡河南禹州陝州暨河內縣清化鎮均設藥材釐金分局禹州並抽收百貨移設衢州府牙釐總局於浙江省城除杭州金華嚴州三府外餘八府均設分局分卡設周口三河尖兩釐稅局三年幫辦揚州軍務漢軍統領富明阿言襄

下河一帶南北糧臺設立捐卡百餘處有一處而設數卡一卡而分數局每月局用少者二百金多者至千餘金委員既繁局費尤濫上以江北如此他省可知嚴飭各督撫歸併裁革遴委賢能地方官經理尋湖北巡撫嚴樹森言胡林翼創辦湖北釐金做劉晏用土類不用吏胥之法歷久著有成效若改歸地方官諸多窒礙並體陳八弊請仍舊章又言湖北釐金年收百三十四萬全賴分設小局稽查偷漏大局之徵收始旺零卡勢難議裁且以一省之財力協濟數省軍餉多藉資釐金輕議更張恐入款頓減均允之是年江北設釐捐總局裁併各卡留存大勝關等二十六卡江蘇亦設牙釐捐總局裁併各卡留存蘇城等十四卡浙江定百貨釐捐值百抽九浙東兩起兩驗間卡抽收貨值千文起卡抽三十驗卡減半捐足兩起兩驗不重徵浙西則一起一驗由第一卡併徵餘皆驗放三年直隸設天津雙廟卡淮南亦設卡抽收鄰私釐金浙江定絲斤捐河南以捻匪肆擾停止禹州釐捐尋復之時湖廣總督官文言直隸山東山西河南陝甘雲貴廣西等省釐金不多軍務告竣即可議撤其餘東南各省釐

金不可驟裁留作善後之費曾國藩則以江甯克復請停廣東釐金上恐餉項不繼未之許也四年撤湖南東征局改江北總局爲金陵釐捐總局福建設稅釐總局徵收百貨及茶釐六年湖北裁存釐局分卡八十六湖南合併分局統名厘金鹽茶總局七年定釐金報部照兩淮鹽釐排式年分兩次時軍務漸平督撫臺諫屢以裁撤釐金爲言上飭各省酌留大宗裁去零星分局於是湖北又裁去五十四局卡浙江裁併十六十八年甘肅開百貨及鹽茶釐捐定廣東省城及佛山江門陳村各繁盛處所補抽百貨坐釐由商承辦九年廣西減釐改徵西稅十年用御史黃槐森言禁革廣東釐局幫費名目並裁汰吏胥直隸改天津府捐輸義館爲百貨釐捐局設東河河南河海河四分卡並於東關設洋藥釐捐局十三年停止山海關之臨榆縣釐局雲南省城設牙釐總局各府屬設分局二十三及各井鹽釐局光緒元年浙江復裁併十四卡存留六十五卡免湖北米穀釐金二年安徽規復蕪湖鳳陽兩關分別裁撤釐卡永免湖南境內運售米穀釐金販運出境者仍於首卡完釐一次三年山西大稜商貨

滯銷裁併各路添設之分卡吉林於雙城堡農安城抽收七釐貨捐四年貴州
貨釐減收二成五七年給事中劉瑞祺言厘捐無裨國計飭各督撫酌量截留
山西以釐金減收復設各分卡八年江楊裁撤分卡一巡卡二滬釐局裁併布
貨捐局閩廣三幫雜貨捐局暨東溝四釐卡並撤古山水橋巡卡明年滬局又
裁東溝大涇兩巡卡十年陝西裁留二十八卡十三年貴州增設二十五分局
先是各省局卡林立擾民病商屢經奉飭裁併而江西一省尙多至七十餘局
御史鄭思賢又以爲言核實刪減二十三年戶部疏言各省釐局中飽弊在承
辦之員不肯和盤托出各省例不應支而非得已者輒於釐稅收欸提留濟川
所謂外銷者也院司類有存案原非自謀肥己然既有外銷之事卽有匿報之
款否則從何羅掘無惑乎人言藉藉僉謂各省實收之數竟數倍報部之數現
在中飽之弊已諱飭各將軍督撫認真整頓自不至仍前泄沓惟外銷之數若
不和盤托出臣部總握度支歲入歲出終於無可句稽卽外銷欸目不能驟議
全裁亦宜咨報臣部權衡緩急內外一氣共濟時艱擬准將外銷最要之欸切

實聲明量予留支使無窘公用此後再有隱匿甚或巧立名目謬稱入不敷出則典守之官不能辭咎上下大學士及廷臣議越二年前上從諸臣議飭各將軍督撫詳細稽核究竟裁去陋規中飽之數若干酌量提歸公用之數若干勒限奏明其外銷欸項應准臚列報部以昭核實所有水陸總分各局卡應如何因地制宜官紳並委著體察情形辦理二十九年江西巡撫柯逢時言江西釐局積弊過深改辦統捐凡納捐貨物黏貼印花概不重徵報聞宣統元年四川以實行禁煙籌抵土藥各稅釐加倍徵收肉釐尤之二年貴州三江釐局改辦木植統捐局陝西百貨釐捐亦改照統稅辦法減爲二十七局

洋藥道光初英吉利大船終歲停泊零丁洋大嶼山等處名曰躉船凡販鴉片煙至粵者先刺赴躉船然後入口省城包買戶謂之窩口議定價值同至夷船兌價給單卽僱快艇至躉船憑單取土其快艇名快蟹械礮畢具行駛如飛兵船追捕不及灌輸內地愈禁愈多各項貨物亦多從躉船私售紋銀之出洋關稅之偷漏率由於此叠經諭飭驅逐嚴拿而躉船停泊快蟹遞私如故十八年

鴻臚卿黃爵滋言自煙土入中國粵奸商勾通巡海弁兵運銀出洋運土入口查道光初年歲漏銀數百萬十四年以前歲漏二千餘萬近年歲漏三千餘萬此外各海口合之亦數千萬年復一年伊於胡底耗銀之多由於販煙之盛販煙之盛由於食煙之衆實力查禁宜加重罪名上懸其言特命林則徐爲欽差大臣赴粵查辦明年截獲躉船煙土二萬八百八十餘箱焚之時定禁煙章程凡開設窩口及煙館與興販吸食無論華洋均擬極刑咸豐七年閩浙總督王懿德等始有軍需緊要暫時從權量予抽捐之請朝旨允行八年與法定約向來洋藥不准通商現稍寬其禁聽商貿易每百斤納稅銀三十兩只在口銷售離口卽屬中國貨物准華商運往內地法商不得護送嗣與各國定約皆如之九年以上以洋藥未定稅前地方官多有私收情弊現既議定稅章自應一律遵辦上海爲各商薈萃之區尤宜及早奉行不得以多報少藉肥私囊兩江總督何桂清請減輕洋藥稅下廷議尋議洋藥稅則各省關均照辦江蘇何得獨異所征稅銀每三月報解不准留支至洋藥釐捐與關稅有別原定銀二十兩毋

庸再加十兩惟不得以洋稅抵作釐捐尤之雲貴總督張亮基言滇省向無洋藥上命先將所產土藥分別徵收稅釐不得以洋藥混土藥十一年上海新行洋藥稅章程而普魯斯領事密迪樂以洋商既定進口稅重徵華商有礙洋商貿易上曰洋商進口華商出口兩稅各不相礙不允其請時稅務司赫德言洋藥抽稅今昔情形不同收稅愈重則走漏愈甚上以其言可采下所司酌議施行光緒初元廣東招商包收洋藥指年認交四十二萬元五年限滿每年遞增二萬元二年與英定約洋藥入口由官稽查封存棧房或躉船俟售賣時照則納稅並令購者輸納例稅以防偷漏其數由各省酌定六年廣東新商接辦洋藥指年認交九元仍五年爲限七年大學士左宗棠言禁食鴉片宜先增稅洋藥百觔擬徵稅釐百五十兩土藥價低准依洋藥推算上命將軍督撫及海關監督各就情形妥議以聞尋直隸總督李鴻章言洋藥旣難驟禁只可先加稅釐煙價增則吸者漸減未始非徐禁示罰之意惟釐稅太重恐偷漏愈多亦須通盤籌計查洋藥由印度先到香港然後分運各口奸商卽於該港私相

授受檢閱貿易總冊同治十三年至光緒四年到港洋藥每年八萬四千至九萬六千餘箱運銷各口有稅者只六萬五千至七萬一千餘箱五年到港十萬七千餘箱運銷各口有稅者只八萬六千餘箱年計私銷二萬數千箱加捐易辦偷漏難防擬於洋藥每百觔正稅三十兩外加徵八十兩統計釐稅百一十兩土藥不論價之高低每百觔徵四十兩帝用其議又以洋藥來自英商命出使大臣曾紀澤與英確商至九年始如前議定約併在進口時輸納十年定不分洋土藥給華商行坐部票例其行票每限十斤斤捐銀二錢經過關卡另納稅釐無票貨沒官其行店坐票無論資本大小年捐二十兩換票一次無票不得售賣十一年定洋藥入口由官驗明封存俟每箱百斤完納正稅三十兩釐金八十兩方允出運十三年與葡定議在澳門協助中國徵收運往各口之洋藥稅釐一如英香港辦法二十八年定洋藥稅釐並徵仍照現行約章嗣後應以釐金作為加稅又定英商莫啡鴉之禁其為醫藥用者進口仍照則納稅俟領海關專單方准起岸違者沒官是年裁浙江洋藥釐金局歸海關釐稅併徵

三十二年德宗銳意圖強命限十年將洋藥一律革除淨盡又以鴉片爲生民之害禁吸尤必禁種爲清源辦法務令逐年減種統限十年將洋土藥盡絕根株是年開廣西巡撫柯逢時缺賞侍郎銜督辦各省土藥統稅設總局於湖北各省並設分局逾年以洋土兩藥稅釐爲歲入鉅款既嚴行禁斷應預籌的疑以資抵補初定莫啡鴉進口每兩徵稅三兩至是以既准醫藥需用減輕照百貨例值百徵五宣統二年度支部奏言各省土藥減收業將浙江福建江蘇安徽山東山西土藥統稅分局先後裁撤其兩湖陝甘兩粵略有收數自應及時收束惟稅局之應否裁撤以有無稅項爲斷而統稅之應否停徵以有無產土爲衡於是分遣司員派赴各省調查明年又奏言現在擬裁土藥統稅分局尙未據各省議定辦法派員接收而洋藥進口已與英定約稅釐並徵每百兩增收二百五十兩土藥亦須同時比例加稅查土藥價值不及洋藥三分之二以徵爲禁稅則無妨略重卽照洋藥稅推算定土藥百觔加徵二百三十兩凡未禁運及本產本銷地方卽按新章徵收從之時與英議定禁煙遞減已滿三年

如於未滿之七年期內土藥禁絕則洋藥亦禁進口以洋藥加稅實行停止各項捐收

會計順治初既除明季三餉南服諸省尙本底定歲入本少而頻年用兵經營四方供億不貲歲出尤距至九年海宇粗定歲入則地丁等款征銀二千一百二十六萬兩有奇鹽課征銀二百一十二萬兩有奇關稅等銀一百餘萬兩米麥豆之征本色者五百六十二萬石有奇歲出則諸路兵餉需千三百餘萬兩王公官俸各費需二百餘萬兩各省留支驛站等款三百餘萬兩其後兵餉增至二千四百萬兩地丁亦至二千五百餘萬兩康熙之初三藩叛逆歲入地丁等款自二千六百餘萬減至二千一百餘萬二十一年三藩削平歲入地丁等銀復至二千六百三十四萬兩有奇鹽課銀亦至二百七十六萬兩有奇關稅等銀二百餘萬兩米麥豆之征本色者爲六百三十四萬石有奇雍正初年整理度支收入頗增至乾隆三十一年歲入地丁爲二千九百九十一萬兩有奇耗羨爲三百萬兩有奇鹽課爲五百七十四萬兩有奇關稅爲五百四十餘萬

兩有奇蘆課魚課爲十四萬有奇茶課爲七萬兩有奇落地雜稅爲八十五萬
兩有奇契稅爲十九萬兩有奇牙當等稅爲十六萬有奇礦課有定額者八萬
兩有奇常例捐輸三百餘萬是爲歲入四千數百餘萬之大數而外銷之生息
攤捐諸款不與焉歲出爲滿漢兵餉一千七百餘萬兩王公百官俸九十餘萬
兩外藩王公俸十二萬兩有奇文職養廉三百四十七萬兩有奇武職養廉八
十萬兩有奇京官各衙門公費飯食十四萬兩有奇內務府工部太常寺光祿
寺理藩院祭祀賓客備用銀五十六萬兩採辦顏料木銅布銀十二萬兩有奇
織造銀十四萬兩有奇寶泉寶源局工料銀十萬兩有奇京師各衙門胥役工
食銀八萬兩有奇京師官牧馬牛羊象芻秣銀八萬兩有奇東河南河歲修銀
三百八十餘萬兩各省留支驛站祭祀儀憲官俸役食料場廩膳等銀六百餘
萬兩歲不全支更走漕船歲約需銀一百二十萬兩是爲歲出三千數百餘萬
之大數而宗室年俸津貼漕運旗丁諸費之無定額者各省之外銷者不與焉
自是至道光之季軍需河工賑務賠款之用及歷次事例之開鹽商等報効修

河工料之攤征凡爲不時之入與供不時之出者爲數均鉅然例定之歲入歲出仍守乾隆之舊是以乾隆五十六年歲入銀四千三百五十九萬兩歲出銀三千一百七十七萬兩嘉慶十七年歲入銀四千十三萬兩歲出銀三千五百十萬兩道光二十二年歲入銀三千七百十四萬兩歲出銀三千一百五十萬兩均有奇咸豐初年粵匪驟起捻回繼之國用大絀迄於同治歲入之項轉以釐金洋稅爲大宗歲出之項又以善後籌防爲鉅欸光緒五年八月翰林院侍讀王先謙奏舊入之欸如地丁雜稅鹽務雜款等共四千萬今止入二千七八百萬新入之欸如洋稅一千二百萬鹽釐三百萬舊出欸如兵餉河工京餉各省留支四千萬今止支二千四百萬新有出欸如西征津防兩軍約一千萬各省防軍約一千萬十年戶部奏更定歲出歲入以光緒七年一年歲出入詳細冊底爲據言臣部爲錢糧總匯之區從前出入均有定額入欸不過地丁關稅鹽課耗羨數端出欸不過京餉兵餉存留協撥數事最爲簡括乃自軍興以來出入難依定制入欸如扣成減平提解退回等項皆係入自出欸之中出欸

如撥補籌還移解留備等項又皆出歸入款之內彙核良非易易此次所辦册籍以地丁雜賦地租糧折漕折清項耗羨鹽課常稅生息等十項爲常例徵收以釐金洋稅新關稅按糧津貼等四項爲新增徵收以續完捐輸完繳節扣等四項爲本年收款除去蠲緩未完各數通計實入共收銀八千二百三十四萬九千一百九十八兩是爲銀收以陵寢供應交進銀祭祀儀憲俸食科場餉乾驛站廩膳賞卹修繕河工採辦辦漕織造公廉雜支等十七項爲常例開支以營勇餉需關局洋款還借息款等四項爲新增開支以補發舊欠豫行支給兩項爲補支豫支以批解在京各衙門銀兩一項爲批解支款除去欠發未報各數通計實出共支銀七千八百十七萬一千四百五十一兩是爲銀支原奏並及錢收糧收錢支糧支實爲明數今按十七年歲入歲出之籍入項爲地丁二千三百六十六萬六千九百一十一兩雜賦二百八十一萬有一百四十四兩租息十四萬一千六百七十二兩糧折四百二十六萬二千九百二十八兩耗羨三百萬四千八百八十七兩鹽課七百四十二萬七千六百有五兩常稅二

百五十五萬八千四百一十兩釐金一千六百三十一萬六千八百二十一兩
洋稅一千八百二十萬六千七百七十七兩節扣二百九十六萬四千九百四
十四兩續完七百十二萬八千七百四十四兩捐繳一百八十七萬五千五百
七十六兩均有奇統爲歲入八千九百六十八萬四千八百兩有奇出項爲陵
寢供應等欸十三萬五千五百五十九兩交進十八萬兩祭祀三十三萬六千七百
三十三兩俄憲七萬四千八百七十九兩俸食三百八十四萬一千四百二十
四兩科場十萬五千二百七十兩餉乾二千三十五萬六千一百五十九兩驛
站一百七十三萬四千七百有九兩廩膳十一萬二千有二十九兩賞卹五十
二萬五千二百十六兩修繕二百二十萬九千七百四十八兩採辦四百有三
萬三千九百有三兩織造一百有三萬四千九百十五兩公廉四百五十七萬
五千七百八十三兩雜支三十萬三千二百七十八兩勇餉一千八百二十六
萬八千三百十三兩關局經費三百十四萬四千六百十六兩洋欸三百八十
六萬一千五十一兩補支一千二百七十七萬五千五百二十五兩豫支一百

七十四萬二千七十三兩解京各衙門飯食經費各項支款三百四十七萬二千五百三十三兩統爲歲出七千九百三十五萬五千二百四十一兩再三年爲甲午朝鮮役起軍用浩繁息借洋款商款及和議既定又借俄法英德之款付日本賠款增攤各省關銀一千二百萬兩益以匯豐克薩華商各款本息及新增宋慶等軍餉共八百萬蓋歲出之增於前者二千萬迨於庚子復釀兵禍辛丑約成遂有四萬五千萬之鉅派之各省者一千八百萬兩有奇二十九年以練新軍復攤各省練兵經費而各省以創練新軍辦巡警教育又有就地自籌之款奉天一省警費至三百餘萬兩湖北一省撥提地丁錢價充學費者六十萬兩捐例停於二十七年以練兵復開至三十二年復停庚子以後新增之徵收者大端爲糧捐如按糧加捐規復徵收丁漕錢價規復差徭加收耗羨之類鹽捐如鹽斤加價鹽引加課土鹽加稅行鹽口捐之類官捐如官員報效酌提丁漕盈餘酌提優缺盈餘之類加釐加稅如菸酒土藥之加釐稅百貨稅之改統捐稅契加征之類雜捐如彩票捐房舖捐漁戶捐樂戶捐之類節省如裁

節錄營俸餉節省河工經費核扣驛站經費節省各署局經費之類實業如鐵路電局郵政收入及銀行銀銅元局官辦工廠商局餘利之類出款自賠款練兵費學警司法諸費外各官署新增費亦爲大端宣統二年度支部奏試辦宣統三年預算歲入爲類八曰田賦經常四千六百十六萬四千七百有九兩臨時一百九十三萬六千六百三十六兩皆有奇曰鹽茶課稅經常四千六百三十一萬二千三百五十五兩曰洋關稅經常三千五百十三萬九千九百七十七兩曰常關稅經常六百九十九萬兩一千一百四十五兩臨時八千五百二十四兩曰正雜各稅經常二千六百十六萬三千八百四十二兩曰釐捐經常四千三百十八萬七千九百七兩曰官業收入經常四千六百六十萬八千九百九兩曰雜收入經常一千九百十九萬四千一百有一兩臨時一千六百有五萬六百四十八兩附列者爲類二曰捐輸五百六十五萬二千三百三十三兩曰公債三百五十六萬兩皆臨時歲入歲出爲類十八曰行政經常二千六百六萬九千六百六十六兩臨時一百二十五萬八千一百八十四兩曰交涉經

常三常三十七萬五千一百有三十兩臨時六十二萬六千一百七十七兩曰
民政經常四百四十一萬六千三百三十八兩臨時一百三十二萬四千五百
三十一兩曰財政經常一千七百九十萬三千五百四十五兩臨時二百八十
七萬七千九百有十四兩曰洋關經費經常五百七十四萬八千二百三十七兩
臨時九千一百六十三兩曰常關經費經常一百四十六萬三千三百三十二
兩曰典禮經常七十四萬五千七百五十九兩臨時五萬四千有三十七兩曰
教育經常二百五十五萬三千四百十六兩臨時一百四萬一千八百九十二
兩曰司法經常六百六十一萬六千五百七十九兩臨時二十一萬八千七百
四十六萬曰軍政經常八千三百四十九萬八千一百一十一兩臨時一千四百
萬有五百四十六兩曰實業經常一百六十萬三千八百三十五兩曰交通經
常四千七百二十二萬一千八百四十一兩臨時七百有八十萬四千九百有
八兩曰工程經常二百四十九萬三千二百四兩臨時二百有二萬二千有六
十四兩曰官業支出經常五百六十萬四百三十五兩曰各省應解賠款洋款

三千九百有十二萬九百二十二兩曰洋關應解賠款洋款一千一百二十六萬三千五百四十七兩曰常關應解賠款洋款一百二十五萬六千四百九十兩曰邊防經費一百二十三萬九千九百有八兩附列者爲類一曰歸還公債四百七十七萬二千六百十三兩統爲歲入二萬九千六百九十六萬二千七百兩有奇歲出三萬三千八百六十五萬兩有奇十二月資政院覆於歲入有增加於歲出有減削次年卽值變更國體故有預算而無決算蓋自光緒三十三年度支部卽奏准令京師各衙署及各省實報歲入歲出又於各省設財政監理官以督之凡昔日外銷之款項與夫雜捐陋規之類及新定之教育司法實業軍政外債諸費皆列於辦書期會故較順治康熙之出入多至十倍茲錄之以見一代財政之盈虧焉其軍需河工賑務賠款之鉅者乾隆初次金川之役二千餘萬兩準回之役三千三百餘萬兩緬甸之役九百餘萬兩二次金川之役七千餘萬兩廓爾喀之役一千有五十二萬兩臺灣之役八百餘萬兩嘉慶川湖陝教匪之役二萬萬兩紅苗之役湖南一省請銷一千有九十萬洋

匪之役廣東一省請銷三百萬兩道光初次回疆之役一千一百餘萬兩二次回疆之役七百三十萬兩英人之役一千數百萬兩咸豐初年粵匪之役二千七百萬其後江南大營月需五十萬兩徽甯防營月需三十萬兩則一年亦千萬湖北供東征之需者歲四百餘萬湖南亦不貲而北路及西南各省用兵之費不與焉同治中曾國藩奏湘軍四案五案合之剿捻軍需共請銷三千餘萬兩李鴻章奏蘇滬一案二案合之淮軍西征兩案共請銷一千七百餘萬兩左宗棠奏西征兩案共請銷四千八百二十餘萬兩此外若福建援浙軍需合之本省及臺灣軍需截至三年六月已逾六百萬兩四川湖南援黔軍需歲約四百萬兩積五年二千萬兩雲南自同治二年至同治十二年請銷軍需一千四百六十餘萬兩而甘肅官紳商民集捐銀糧供軍需者五千餘萬兩再加各省廣中額學額計之當不下數萬萬光緒中惟中法之役用三千餘萬兩若西征之餉海防之餉則已入年例歲出不複列河工自康熙中卽趨重南河十六年大修之工用銀二百五十萬兩原估六百萬兩迨蕭家渡之工用銀一百二十

萬兩自乾隆十八年以南河高郵邵伯車邏壩之決撥銀二百萬兩四十四年
儀封決河之塞撥銀五百六十萬兩四十七年關陽決河之塞自例需工料外
加價至九百四十五萬三千兩浙江海塘之修則撥銀六百餘萬兩荊州江隄
之修則撥銀二百萬兩大率興一次大工多者千餘萬少亦數百萬嘉慶中如
衡工加價至七百三十萬兩十年至十五年南河年例歲修搶修及另案專案
各工共用銀四千有九十九萬兩而馬家港大工不與二十年睢工之成加價
至三百餘萬兩道光中東河南河於年例歲修外另案工程東河率撥一百五
十餘萬兩南河率撥二百七十餘萬兩逾十年則四千餘萬六年撥南河王營
開壩及堰圩大隄銀合爲五百一十七萬兩二十一年東河祥工撥銀五百五
十萬兩二十二年南河揚工撥六百萬兩二十三年東河牟工撥五百十八萬
兩後又有加咸豐初豐工亦撥四百萬兩以上同治中山東有侯工賈莊各工
用款二百餘萬兩光緒十三年河南鄭州大工請撥一千二百萬兩其後山東
時有河溢然用款不及道光之什一賑務康熙中賑陝西之災用銀至五百餘

萬兩乾隆七年江蘇安徽夏秋大水撫恤正賑加賑江蘇給被災軍民等米共一百五十六萬石有奇銀五百五萬兩有奇安徽給被災軍民等米八十三萬石有奇銀二百三十三萬兩有奇十八年以高郵運河之決撥米穀一百十萬石銀四百萬兩賑江蘇災此其最鉅者其後直隸山東江蘇河南湖北甘肅諸省之災發帑截漕及資於捐輸者不可勝舉嘉慶初山東曹單等縣災賑銀米合計三四百萬兩六年以直隸水災撥賑銀一百萬兩截漕米六十萬石江蘇安徽山東河南諸省之因災賑恤者節次糜帑均不下數十百萬資於捐輸者如十九年江蘇安徽之災至二三百萬兩道光十一年撥江蘇賑需銀一百餘萬兩二十七年賑河南災銀一百餘萬兩二十八年賑河北災銀一百三十八萬兩二十九年撥江蘇等四省賑災銀一百萬兩而安徽浙江之截留辦賑者皆近百萬江蘇一省則一百四十餘萬此外尙多而官紳商民捐輸者尙不與光緒初山西河南陝西之災撥帑截漕爲數均鉅合官賑義賑及捐輸等銀不下千數百萬兩鄭州河決賑需河南用銀二百五十餘萬兩時各省有水旱之

災輒請開賑捐直隸自十六年之水至二十一年海嘯之災用銀七百餘萬兩山東自十一年後頻年河溢至二十五年用銀七百餘萬兩江蘇自十五年之水至二十四年淮徐海之災用銀五百餘萬兩二十七年秦晉之災則開實官捐以濟之爲數至七百六十萬兩有奇賠款始于道光壬寅江甯之約二千一百萬兩咸豐庚申之約一千六百萬兩光緒辛巳伊犁之約六百餘萬兩乙未中日之約併遼南歸地二萬三千萬兩至辛丑公約賠款四萬五千兩而極以息金計之實九萬萬餘兩清代田賦徵糧之數乾隆三十一年爲八百三十一萬七千七百石有奇江蘇安徽山東河南浙江江西湖北湖南八省自歲漕京師外留充本省經費直隸奉天山西陝西甘肅福建四川廣東廣西雲南貴州則全充本省經費光緒十年新疆改行省歲徵糧二十七萬一千石有奇亦全充本省經費吉林黑龍江之徵米者亦如之各省駐防旗營官兵綠營兵丁皆支月米凡留充本省經費者大率供旗綠營月支米豆之需有餘則報糶易銀候撥云